


Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.678






Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.678




Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.678





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.678








1. 6. 678















IO. ANTONII
VIPERANI

DE OBTEŃTA PORTVGALIA
A REGE CATHOLICO
PHILIPPO

HISTORIA.



NEAPOLI,
Apud Horatium Saluiannum.
M. D. LXXXVIII.
Superiorum permissu.

IO. ANTONI
VIPERANI

DE OBTEHTA PORTVGLIA
A REGE CATHOLICO
PHILIPPO

HISTORIA



NEAPOLI
M. D. LXXXVIII.
Sapientia

SERENISS.^{MO} PRINCIPI

ALBERTO S. R. E. CARD.

LEGATO,

ARCHIDVCI AVSTRIAE,

*ac pro Rege Philippo in Portugalia
regnis Gubernatori*

IO. ANTONIVS VIPERANVS.



*Istoriā Serenissime Al-
berte, quam de obtenta
Portugalia à Rege Catho-
lico Philippo, auunculo
tuo, scripsi, quòd res novas
& varias contineat, belli-
cas & ciuiles, ac graues & inopinatos rerum
euentus, non solum profuturam, sed etiam sa-
tis delectaturam putauī. Continet enim mise-
rabilem Portugalensium regis Sebastiani necē
in Mauritania cum duorum regum Mauro-
rum interitu; & Henrici S. R. E. Cardina-
lis, qui post Sebastianum in Portugalia re-
gnauit, ad declarandum successorem suum
acta; tum eorum iura, qui in petitione regni
concurrerunt; deinde quorundam Portuga-
A 2 lensium*

lensium motus cōtra Regem Catholicum Philippum, cuius in Portugalam ius optimum esse iudicabatur; postremò victum profligatumq; Antonium, quem aliquot Portugaleses Philippi aduersarij regem creauerant. Nec de huius historie fide quicquam dubitandum cuiquam est, quæ ita verè narrat omnia, ut nihil in ea falsum fictumq; sit omnium sententia, qui rebus ipsis interfuerunt. Debetur autem Serenissime Alberte tuo nomini huius historia dedicatio vel ob hanc maximè causam, quòd pro rege Philippo auunculo tuo ipsam Portugalam summa cum prudentia & equitate regis, auunculo pariter et Portugalesibus charus: atq; ipsam expectationem superas, quam de tuo ingenio, & virtute conceperamus. Sed & mea fama consultum bene fuerit, si mei patrocinium pro tua benignitate susceperis.

10. AN-

IO. ANTONII

VIPERANI

DE OBTEENTA PORTVGALIA

A REGE CATHOLICO

PHILIPPO

HISTORIA.



PORTVGALIA est in extrema Hispania, quæ in Occidentem vergit, ac magnam Lusitaniam partem continet, quæ est tertia pars totius Hispaniæ. Nam Hispania omnis in tres diuisa est partes: quarum vnam Bæticam, alteram Tarraconensem, tertiam Lusitaniam appellarunt. Quæ quidem à Tarraconensi, qua parte ad Septentriones erigitur, flumine Durio; à Bætica flumine Ana diuiditur, qua spectat in Orientem; cæterum ab occasu Solis & meridie Oceano cingitur. Est autem (vt Lusitanarum rerum scriptores prodiderunt) à portu oppidi Calis sic appellata Portugalia, quod M. circiter & D. pass. à litore distat, & Durio imminet, vbi in Oceanum influit. quippe ab eius portus celebritate

Ana vul-
go Gua-
diana.

Cale ho-
die Por-
tus.

ex

ex frequentia mercatorum vndiq; commeantium quod erat vnus loci proprium nomen in vniuersum regnum deriuatum est. Vnde idem regnum modò Portugalia, modò Lusitania nominatur. Hæc Gregorio XIII. Pont. Max. sub rege Sebastiano huius nominis primo, reliqua Hispania sub rege Catholico Philippo II. erat, Caroli V. Imp. F. Sed in prælio à Mauris interfecto Sebastiano, & Henrico S. R. E. Cardinale, qui post Sebastianum regnum obtinuit, vita functo, ad regem Philippum propinquitatis iure peruenit. Verùm operæpretium est prius Sebastiani interitum, & Henrici acta breuiter enarrare, quàm explicem quo modo rex Philippus Portugalam adeptus sit. Sebastianus iuuenis natura ferox, magna vi corporis, auidus imperij (quam cupiditatem præceptorum cohortationes, & assentatorum blanditiæ magis ac magis accenderant) ardebat animo vel in Indiam nauigare, vel in Africam se traicere, vt nationes à Christianorum moribus & institutis alienas suæ ditioni subigeret. quibus in regionibus olim multæ vrbes à Portugalensibus parua manu, magna cum gloria captæ, & imperio Portugalensi adiunctæ sunt. Ac primò in Mauritaniam Tingitanam cum paucis transmisit, vt regionem, ac loca, & oppidorum situs perspiceret: nec multo post deinde à Mahomethe Marrochensium & Fessensium rege contra patrum suum Moluchum, à quo regnis spoliatus fuerat, rogatus auxilium ad bellum Mauritanicum toto pectore incubuit: ac contra Mahomethis sententiam

& vo-

& voluntatem arma contra Moluchū suscepit. Nam Mahomethes tantū auxilia contra Moluchū petebat, &, ne cum exercitu in Mauritaniam transiret, enixè regem Sebastianum orabat, vt ne quid Mauri de eius aduentu suspicarentur, quòd non ad ferendum auxilium, sed ad occupandam Mauritaniam veniret. qua Maurorum animis iniecta suspicione (porrò facilè credimus quæ timemus) nec qui secum essent, contra Moluchum pugnarent; nec qui cum Molucho, ad se vnquam transfugerent. Spem verò recuperandorum regnorum se non solū ab his, qui secum erant, sed etiam ab illis, qui Moluchum sequebantur, accepisse: quòd ad se transfugere constituissent, si defendendi sui vires aliquas habuisset. At Sebastianus bellum ipsemet contra Moluchum pro Mahomethe gerere voluit, ratus occasionem occupandi vniuersam Mauritaniam sibi tunc diuinitus oblaram: è qua Turcam excluderet, & religionem Christianam inferret, ac sibi Marrochensium Imperatoris nomen acquireret. Nec multa disputatione res in Portugalensium concilio agitata est, licet longa disputatione indigeret. quippe cū eius voluntatem obstinatam viderent, maxima pars idem velle cum rege, ac sentire simulavit, pauci, quos regis, regniq; charitas mouebat, bellum dissuadere: quòd non parum metuendum esset de Maurorum vana fide, de regis Sebastiani iuuenili furore, de regni orbitate, si quis aduersus casus regi eueniret. Atque etiam rex Philippus ipsius Sebastiani auunculus. cui vnā è duabus suis filia-

*Aqua Lu-
pia vulgò
Guadalu-
pe.*

filiabus in matrimonium dare cogitabat, ad ædem S. Mariæ ad Aquas Lupias in Castella, vbi reges ambo conuenerant, vt de multis inter se rebus differerent, plurimis rationibus illius animum ab hoc bello retrahere conatus est. Monebat ne bellum temere susciperet, quod est consilio, non casu gerendum; neve infidis fidem vllam haberet. Mauros ingenio esse mobili & infido, quibus pulchrum est fallere, præsertim Christianos, quos acerbè & penitus odere: non iurisiurandi religione tangi, non beneficiorum & amicitia memoria moueri, semper cum fortuna fidem mutare. eundem, quem nunc amicum putat, mox sibi hostem futurum: bellumq; totum postremò in se vnum conuersum iri. Reputaret animo sibi cum paucis contra innumerabiles copias in alienis sedibus suo cum periculo pro alterius commodis pugnandum. Ne fortunam tentaret, & in discrimen se, remq; suam inconsultè conijceret. Euentus quidem belli incertos esse, sed rarò voluntatibus hominum respondere. Quòd si tandem in Mauritania bellum facere destinasset, Larachem expugnandam curaret, maritimum, & ad res multas opportunum oppidum: vnde piratas mauros & turcas eijceret, atque in Hispanias Afris transitum præcideret. se ad hoc bellum ei cum L. triremibus V. millia veteranorum militum Hispanorum missurum. Nec verò tamen ipse bello interesset, sed alicui strenuo, & rei militaris scienti duci administrandum committeret: ipse suo in regno remaneret, iuuenis, relictus vnicus regni hæres, necdum vlla suscep-

*Zarache
olim
Lixa.*

PORTUGALIA.

5

suscepta sobole, nec ducta vxore. Iisdem quoq;
 rationibus alij regis Philippi aulæ primarij, quos
 interdum Rex submittebat, vt idem confirmarent,
 ab huius belli cura Sebastianum reuocare moliti
 sunt. At frustra omnis oratio. Nam quamuis di-
 ceret se Larachem tantum armis oppugnaturum,
 tamen semper animo bellum contra Moluchum
 agitabat, vt aliqua illustri victoria se, nomenq; su-
 um nobilitaret. Sed neque Henricus S. R. E. Car-
 dinalis, patris patruus, neq, regina Catharina aua
 monendo, ac rogando ne bellum sumeret indi-
 gnum se, neq; necessarium, & importunum, iuue-
 nis, sine prole, ac belli neruis, quicquam eius ani-
 mum flexere: qui non tantum Mauritaniam, sed
 vniuersam Africam cogitatione inuaserat: & cui ab
 assentatoribus persuasum erat neminem posse ar-
 morum Portugalensium impetum sustinere, cæcus
 ad optatum bellum rapiebatur. Augebatq; spiritus
 Arzilla oppidum in Mauritania illi Moluchi odio
 ab Abdelcherino præfecto traditum. Ergo totus
 deinceps animo & opibus huic bello insistent, na-
 ues instrui, nautas & gubernatores conquiri, milites
 scribi, exercitum cogi, arma, tela, tormenta, &
 quæ ad bellum vsui forent comparari iussit. Om-
 nis nobilitas cum armis & equis regi præstò fuit.
 quandoquidem Portugalenses fideliter & amanter
 suum regem colunt. M. D. equites, pedites ad xv.
 M. coacti sunt: sed eorum maxima pars rudis &
 iners. Classis maiorum nauium operariarum LX.
 triremium VII. præter alia diuersorum generum

Arzilla
olim
Zilia.

B

mitera

*Gades
vulgò
Caliz.*

*Tingis
vulgò
Tanger.*

minora nauigia numero ferè Dccc. Igitur rebus omnibus ad profectiõem comparatis anno M.D. LXXVIII. ix. Kal. Iulij Olyfsipone soluit, ac Gades tenuit. vbi à sapientioribus viris tandem sibi persuaderi siuit Larachem solùm petere, non aliò exercitum ducere. Deinde hac mente hinc rectà in Mauritaniã traiecit, atque ad oppidum Tingim, quod in Portugalsium potestate est, classẽ applicuit. quo in loco Mahomethes cum paucis Mauris illi præstolabatur: ac secundam nauigationem gratulatus est, & de allatis auxilijs gratias egit; sed rationem iuuandi se contra Moluchum reprehendit. Negabat enim regem ipsum in Mauritaniã venire oportuisse, quòd eius præsentia suorum belandi studium restinctura, & aliorum à se animos alienatura esset. quoniam Mauris omnibus à Christianis metus est, ne tandem societatis specie decepti hostile aliquid patiantur. Quamobrem tantùm vt aliqua sibi contra Moluchum auxilia daret postulauit. Cui rex Sebastianus respondit se nihil nisi de confiderato & explorato consilio fecisse, atq; facturum. Tum mauris militibus Mahomethis iussis terrestri itinere Arzillam ire (quod oppidum ab Abdelcherino regi Sebastiano traditum suprà memoraui) ipsi reges occidentalem Africæ oram legentes eòdem classẽ appulerunt. At Moluchus, qui ingentem equitum & peditum numerum comparauerat, profectusq; Marcho montes, quos Sus vocant, circumierat, præsidia certis locis disposuerat, quos ad defectionem spectare cognouerat

pauis

punierat, dubios confirmauerat, ac demum in Tasmena loco plano, & opportuno haud longè ab Alcaffare quibirio castra fecerat, post nunciatum sibi regis Sebastiani aduentum, & classis ad Arzillæ litus appulsum, Agmethem fratrem cū III. M. equitum & II. M. peditum Arzillam versùs misit hostium consilia exploratum. Verùm Sebastianus postquam Arzillam nauibus attigit, XX. M. pass. ab Arzilla Larachem terra petere constituit. Itaq; milites, arma, tela, tormenta in terram exponi, ac militibus in dies viij. cibaria distribui, & classis præfectum Larachem adnavigare iussit. Ergo Arzilla proficiscuntur, atque iter ad flumen Almechazem XXVII. M. pass. hinc dirigunt: quo transito Larachē flectant. Quam rem Moluchus ex transfugis & speculatoribus cognoscens, latus castra contra hostem mouit: atq; ad Alcaffarem quibirium confedit. At Mahomethes, quem in via certiores perfugæ faciunt de maximo hostium numero, & de Moluchi mortifero morbo ex dato (vt suspicio erat) veneno, Sebastianum vehementer orat atq; obsecrat, ne longiùs progrediatur, quoad certum de Moluchi valetudine nuncium accipiant: cui grauissimè agrotanti mors instare creditur. post eius mortem Mauritaniæ principes ad se illico transituros. Sic bellum ex voto sine prælio & vulnere confectum iri. Sed rerum necessariorum penuria & Sebastiani feruor animi nullam moram sustinent. Iam ad flumen Almechazem peruenerant, quod per apertum campum Alcaffaris quibirij fuit X. M. pass.

B 2 hinc

hinc Alcaffarequibrio: nec toto itinere Maurus vltus vsquam visus fuerat. quæ res prudentioribus viris à callido & potente hoste metum iniecit: quòd fluminis transitum Christianis liberum reliquisset, vt post transitum sese illis in patente campo cum maximis copijs ostenderet, atque ad necessarium certamen pertraheret. Nec res aliter euenit. Nam vt Sebastianus flumen transmisit, & in planitiem euasit, ac III. m. pass. à flumine progressus est, hostes vndiq; aduolare conspecti sunt. quorum aspectus rerum bellicarum insolitos non mediocri metu affecit. Et quamuis pugnae conditio iniqua esset in patente omni ex parte campo paucos pedites cū magna equitum multitudine congregati, tamen cibarij inopia, quæ iam consumpta erant, & hostium propinquitas, quæ nullum facilem Portugalsibus receptum dabat, ad pugnandum eos coegbat. Atque etiam Sebastianus turpe existimans detrectare certamen, aciem instrui, & in hostem dirigi iussit. Et Moluchus propius accedens acie in orbem medium instructa, è lectica, qua decumbens vehebatur, in equum imponi se voluit, vt hostilem exercitum cerneret. quem procul à flumine in lata planitie conspiciens, conuersis ad suos oculis, Vicistis, inquit. plures contra pauciores, loco etiam vobis æquiore pugnabitis. Nolite pati tam præclaram victoriam vobis è manibus elabi. Signum igitur pugnae vtrique datur: ac primo congressu pulsus Maurus: sed mox omnis equitum & peditum à tergo & lateribus circumfusa multitudo exerci-

PORTUGALIA.

exercitum Portugalem breui vndiq; circumue-
nit, permultos cecidit: reliquos victos cepit, suo-
rum paucis desideratis pridie Non. Augusti. Ipsos
quoque reges alium alius casus oppressit. Sebastia-
nus in acie fortiter dimicando mortem occubuit:
Mahomethes in fuga errore vadi merfus in flumen
Almechazem interijt: Moluchum in ipso pugnae
initio in lectica morbus extinxit. quorum calamita-
tem ardens cometa praenunciauerat. Sic Portuga-
lensium regis Sebastiani iuuenilis ardor ex inscien-
tia & audacia miserabilem casum inuenit. qui alio-
quin si ingentem illum suum spiritum doctrina &
ratione rexisset, ob egregias animi corporisq; dotes
profecto vir amplissimus ac clarissimus euasisset.
Ad huius cladis nuncium magnus moeror vniuer-
sam Portugalam inuasit. Dolebant regis necem,
regni vires afflictas, nobilitatem amissam, Lusita-
nae virtutis gloriae nescio quid obscuratam. Cogni-
tumq; est sapienter & verè dictum esse, Vae regno,
cuius rex puer est. Post regis Sebastiani interitum
Henricus S. R. E. Cardinalis, quod solus de virili
Portugalsium regum legitima sobole superesset,
comuni omnium ordinum consensu regni guber-
nacula prehendit. Tunc Rex Catholicus Philippus
II. in Portugalam legauit Christophorum Moram
nobilem Olyssiponensem, domesticum suum, cuius
fidei & prudentiae fidebat, vt regem Henricum, &
Portugalsium primarios de suo in Portugaliae re-
gnum post ipsius Henrici mortem iure doceret: quo-
niam filius sororis Henrici natu maximae, ac mas
esset

esset, atq; omnes, qui ius aliquod in idem regnū haberent, ætate præiret. Quā legationē Christophorus egregiè obiit. Cū autem Henricus infirma valetudine, & ætate prouectum se videret, veritus ne si vita decederet non declarato suo successore, variæ nobilium dissensiones, & graues populi motus fierent, hanc cogitationem suscepit, vt eorum, qui ius aliquod in Portugalix regnum habere censerentur, rationes dispiceret: atque illum deinde renunciaret Portugalsium regem, ad quem regni successionem iure pertinere cognouerit. Ac grauiter tulit, quòd Antonius Ludouici fratris sui filius spurius, natus ex concubina obscuris orta parentibus, iudæis, vitulium rerum venditoribus, nuper ad Ecclesiam Christianam admissis, atque olim in sacrum Ecclesiæ Diaconorum ordinem receptus, postea miles Hierosolymitanus factus, quanquā à Pontifice maximo his legibus, quæ spurium initiari, & initiatum fieri militem vetant, absolutus, regnum petere auderet, asserens matris suæ nuptias legitimas fuisse. Diuq; dubius fuit vtrum illi iudicium concederet, an non. Nam actionem dare, quam leges adimunt prohibentes spurios in regni hæreditatem vocari, istud erat plures lites ferere: at si non dedisset, quia maximè popularis esset, timebat ne multa misceret atque turbaret. Tandem ad dandam illi actionem inclinauit, atque in iudicium admittendum duxit, è quo planè excludendum intelligebat, quoniam facile spurius esse conuinceretur: vt malè exiens iniquitatem suæ causæ doleret, non alterius iniuriam querere.

PORTUGALIA.

II

quereretur; & illius fautores in errorem inductos se esse perciperent; sibi autem deinceps iure liceret & Antonij, & studiosorū eius insolentiam & contumaciam vindicare. Ac Gregorium XIII. Pontificem maximum rogauit, ut causam de nuptijs matris Antonij, cuius iudicium ad sedem Apostolicam spectaret, in Portugalia agi sineret, atque ijs iudicibus, quos ipsemet Pontifex voluisset, iudicandam permetteret: quia plurimum interesset ad communem Portugaliæ tranquillitatem maturè, qui post se regnet, ante suum obitum declarari; cū senex, & valetudinarius sit, multaq; à factiosis hominibus contra rempub. struantur. nec verò ante cognitam causam de nuptijs matris Antonij regem denunciandum. Cui postulationi Pontifex benignè concessit: ipsumq; Henricum causæ iudicem præposuit. Henricus igitur de regni successione iudicium constituit, & eos, qui actionem aliquam petendi regnum habere putabantur, citauit, ut ad statum diem adessent: ac pro se quisque experiretur. nominatimq; citauit regem Catholicum Philippum, Emanuel Philibertum Ducem Allobrogum, Catharinā Ioannis Ducis Brigantini vxorem, Rainutium Farnesium filium Mariæ sororis Catharinæ, & Antonium Ludouici fratris sui filium. Sed istorum inter se, & cum rege Henrico affinitatum vincula explicanda sunt, quò cuncta meliùs cognoscantur. Portugalsium rex Emanuel, cuius egregia virtus fuit, & nomen toto orbe terrarum illustre, ex Maria Ferdinandi Aragonensium regis & Isabellæ Castellanorū reginæ

reginæ coniugum filia IX. liberos suscepit, Ioannem, Isabellam, Beatricem, Ludouicum, Ferdinandum, Alphonsum, Henricum, Odoardum, Antonium. Ioannes omnium primus post patrem regnauit huius nominis tertius: atque ex Catharina Caroli V. Imp. sorore filium habuit nomine Ioannem. Is uiuo patre obiit, atque vnicum filium Sebastianum ex Ioanna Caroli V. Imp. filia reliquit. quem iuuenem à Mauris interfectum in prælio supra demonstrauius. Isabella Carolo V. Imp. nupsit: cuius satu editus est rex Philippus. Beatrix coniuncta in matrimonio Carolo Philiberto Duci Allobrogum Emanuelem genuit. Ludouicus ex concubina Antonium procreauit. Ex Odoardo Maria, quæ Alexandro Farnesio Octauij Ducis Parmensis f. nupta Rainutium peperit, & Catharina Ducis Brigantini vxor nata est. Ferdinandus sine liberis obiit: Antonius migravit infans è vita: Alphonſus & Henricus in S. R. E. Cardinalium collegium cooptati sacris initiati sunt; sed alter è vita excesserat, alter solus è filiis regis Emanuelis superstes in regis Sebastiani demortui locum successit. Quapropter cum Henrico deuincti cognationibus & affinitatibus erat rex Catholicus Philippus ex Isabella, Emanuel Philibertus ex Beatrice, Antonius ex Ludouico, Rainutius ex Maria Odoardi filia, Catharina ex eodem Odoardo prognata: quorum parentes iam hanc vitam deseruerant, ipsi in petitione regni concurrunt. Dux Brigantinus & Antonius ante regem Henricum Olyssipone omnium Portugalensium vrbium principe

principe in iudicio adfuerunt, alter Catharinæ vxoris suæ ius defendens, alter suam per se ipse causam agens. At Rainutius Farnesius Ferdinandum Farnesium Episcopum Parmensem pro se cognitorem allegauit. Emanuel Philibertus licet regis Philippi ius suo melius esse sciret, tamen quia ius suum cæterorum iuribus potius esse intelligebat, vt de successione quæstio omni ex parte ageretur, atque omnis dubitandi ratio tolleretur, Carolum à Ruuere iuris sui vicarium misit. Rex Philippus Petrum Gyronium ducem Osunæ potentem & honoratum principem legauit cum Christophoro Mora (quem etiam ante solum statim post regis Sebastiani mortem legauerat) duobusq; delectis iurisperitis Roderico Vafchio ab Arce & Ludouico Molina. Interim quoq; rex Henricus totius regni concilium conuocauit: in quo ordinibus edixit, quoniam de successione in regnum controuersia longiorem disputationem postularer, ipse verò grandis natu, & agra valetudine esset, vt l. X. ex omnibus nobiles viros legerent in Lusitanis prudentia & dignitate præstantes: è quibus ipse V. seligeret; qui, si diem obire sibi contigisset ante litem regni dijudicatam, ipsi regnum communi consilio & autoritate gubernarent, donec iudicatum de successione esset. Insuper XXIV. iurisperitorum delectum haberent doctrina & probitate excellentium, è quorum numero ipse XI. exciperet, qui de regni successione cognoscerent, ac iudicarent eorumq; sententijs cui

C regnum

Osuna non nullis Anania.

regnum adiudicatum foret, traderetur. Gubernatorum verò & iudicum nomina secreta dum viueret apud se habiturum, ne cui fas sit corruptelam aliquam iudicij moliri. Præterea voluit omnes ordines, & ducem Brigantinum pro Catharina uxore, & Antonium iurare gubernatorum ac iudicum sententijs & decretis se planè semper obtemperaturos. Quæ Portugalensibus non ingrata fuere, quòd sperarent hac via regnum non nisi alicui Portugaliensi principi adiudicatum iri: quamuis aliqui nullam omnino rationem externorum haberi maluissent. Igitur causa agitur: & quisque ius defendit, cuius est cognitor. Atverò Catharina Henrici III. Gallorum regis mater etsi ad idem iudicium vocata non fuerat, tamè Urbanum à sancto Gelasio Episcopum Comingensem misit, qui Portugalensium regi ius exponeret, quod ipsa in Portugaliæ regnum haberet. Referebat Alphonsum huius nominis tertium Portugalensium regem, fratrem Sancij, cui Capeli cognomen fuit, antequàm regnum obtinuisset, habuisse in Gallia uxorem Matildam, ex eaque filium suscepisse Rodulfum dominum Bononiæ in Gallia oppidi: deinde post obtentum regnum uxorem duxisse Beatricem filiam Alfonsi XI. regis Castellæ, atque ex ea Dionysium genuisse. Quare Portugaliæ ad Rodulfum ex priore coniugio natum obuenire debuisse, non ad Dionysium ex uxore secunda procreatum: eademque ratione ad Rodulfi potius, quàm ad Dionysij nepotes pertinere. Reginam Catharinam à Rodulfi nepotibus mater-

num.

*Bononia
olim
Gessoria-
cum.*

PORTUGALIA.

13

num genus ducere. Qua oratione non modò regnū
poscebat, verū etiam ipsum regem Henricum, &
quotquot ab Alfonso reges fuere, malè captæ Portu-
galix hæreditatis accusabat. Vnde quoniam par
non erat stultam legationem censere, à quibusdam
existimatum est Episcopum Comingensem specie
quidem petendæ Portugalix hæreditatis, sed re ve-
ra missum, vt cum Portugalensibus secretò aliquid
contra regem Philippum ageret. quem Galli, qui
cum Hispanis continuas similtates exercent, vide-
bant omnium Christianorum regum, quotquot vn-
quam fuere, ex Portugalix possessione potentissi-
mum fore. Quod Catharinæ ius, quia nullum om-
nino erat, quoniam ex rerum Portugalensium, Gal-
licarum, & Belgicarum monumentis constaret Al-
fonsum nullos ex Matilda liberos suscepisse; & Ro-
bertum, qui post obitum Matildæ Comitatum Bo-
noniæ obtinuit, non ex Matilda, sed ex Matildæ so-
rore Alida Claramontis & Aruerniæ Comitis vxo-
re natum fuisse, ab omnibus neglectum est: mens
tamen, & voluntas à quibusdam probata. Et An-
tonius iussus matris suæ nuptias legitimas ostende-
re quatuor testes dedit, duos è nouis, materteram
inquam suam, & materteræ maritum, duos è ve-
teribus Christianis ortos; quos subornauerat, vt ro-
gati de matris suæ nuptijs dicerent legitimas fuisse,
seque ipsi interfuisse. Qui ortum è veteribus Chri-
stianis ducunt, conscientia conuicti falsi sunt se qui-
dem ab Antonio instructos fuisse, vt affirmarent
eius matrē Ludouico patri legitimè nupsisse, re vera

C

2

tamen

tamen se nihil de hoc matrimonio scire. At matertera maritus & matertera testificati sunt verum & legitimum connubium fuisse, seq; ipsis nuptijs interfuisse. Verum minutatim de loco, tempore, & his, quæ factum circumstant, interrogati cum inter se dissentirent, neq; eorum constaret oratio, rex Henricus ipsos tanquam aperte fictos falsosq; testes in carcerem conijci, & debitis supplicijs affici iussit: ipsumq; Antonium sedens iudex cum IV. Episcopis, totidemq; iuris peritis, quos ad cognoscendam secum causam adiunxerat, pronunciauit spurium esse non modò omnium opinione semper ita habitum, sed etiam à Ludouico patre voce, ac scripto sæpe; ac demum testamento renunciatū: sua quoq; confessione conuictum, quòd olim à Iulio III. Pontif. max. quibusdam legibus, quæ cōtra spurios sunt, absoluti postulauerit; absolutusq; sit. Nec multà à lata sententia dies intercessere, cum à prioribus altera Gregorij XIII. Pontificis Maximi littera vel Antonij rogatu, quòd alios, quàm Portugalenses iudices appellasset, vel Alexandri Frumenti in Portugalia Nuncij Apostolici opera, qui cum Antonio magis facere, quàm cum rege Philippo existimabatur, regi Henrico redditæ sunt: quibus Pontifex maximus priores suas litteras interpretatus, quòd in illis Antonij causam agi tantum in Portugalia, non etiam iudicari sensisset, aperte iubebat ne in Portugalia iudicaretur, sed iudicanda Romam ad se transmitteretur. Quod rex Henricus satis acerbè accepit: questusq; his litteris
non

non modò authoritatem suam immeritò cōtemni,
& integritatem in tam aperta causa violari, sed etiā
diffensiones ciuiles ali, & reipub. Portugalensi ex
uarijs motibus occasum afferri, asperius, quàm eius
mores ferebant, Pontifici rescripsit. Atque illum
hoc etiam malè habuit, quòd sensit Romæ per no-
uos Christianos, quorum ortus à Iudæis est, agi, vt
de Antonij causa iudicium, cuius maternum genus
ex iudeorum stirpe profectum esse sciunt, prolate-
tur: quoniam in magna spe habent ipsum aliquan-
do ab omnibus regem creandum, si nullus denun-
ciatus rex sit. Cùm verò intelligeret Antonium cō-
tra iusiurandum, quo iurauerat se re iudicata statu-
rum, ac nihil contra moliturum, multa mouere, ac
modò plebem, modò ciuitatum & Dynastarum
procuratores ambire, hortari, rogare, multaq; illis
polliceri, vt se regem creent, quòd regis creatio ad
ipsum pertineat, iussit illum ex vrbe Olyssipone, to-
toq; vrbis agro intra certum diem excedere: edi-
xitq;, ne posthàc Olyssiponem reuerteretur, com-
minatus illi, ni paruerit, pœnam, quæ contra non
obedientes regis imperio, & contra perturbantes
regni pacem & tranquillitatem constituta est. Pa-
ruit edicto regis Antonius: sed mox acriùs stimulā-
te animum regnandi cupiditate Olyssiponem re-
dijt; eademq; mouere cœpit. Quod sentiens rex
Henricus illum vt reum citat; atq; adesse negligen-
tem bonis omnibus spoliat; & ni è finibus regni ex-
cedat, pœnam cōstituit, quæ de lædentibus regiam
maiestatem sumitur. Graues quoq; pœnas contra

eos

eos ſancit, qui Antonium teſto exceperint, aut re aliqua iuuerint, vel eius rebus vlllo modo fauerint. Poſt quæ Antonius procul à conſpectu regis Henrici latuit. At verò regis Philippi procuratores, quibus rex præceperat ſuo nomine regē Henricū orare, vt ius ſuum benè perſpiceret, atq; vbi perſpexiſſet optimum eſſe, non dubitaret ſe regni ſucceſſorem Portugalenſibus denunciare, ſic de regis ſui iure apud regem Henricum diſceptant.

In regnum non morientis teſtamento, ſed propinquitatis iure ſuccedi. Regnum enim ei, quem vnum ex omnibus delectum ciuitatis principem, & reipub. moderatorem conſtituerunt ad tollenda ciuium diſſidia, quæ in noua regis creatione ex dominandi libidine ſemper enaſcerētur, hac conditione delatum à populo, vt in demortui regis locum qui propinquitatis vinculis coniunctiſſimus illi eſſet, ex legitimis natus nuptijs, ſuccederet. Quòd ſi plures eundem propinquitatis gradum tenerent, mas ſceminæ, & maior natu minori præponeretur. Proinde regnum eſſe non demortui, ſed generis hæreditatem, eandemq; indiuiduam, ac iure ſanguinis adeundam: quæ non ad eum, quem rex moriens voluerit, ſed quem illi ſanguinis cognatione proximum natura fecerit, venit. Ipi regi Henrico regem Philippum omnium, qui Portugaliam ſucceſſionis nomine petūt, neceſſitudine proximum eſſe: interiorem quidem Philiberto, non modò quia mater eius Iſabella ſemper auguſta Beatricem Philiberti matrem ætate anteuerit, ſed quia ipſe

ipse rex Philippus Philiberto grandior natu sit; Catharina verò, quòd eam sexus nobilitate, & ætatis authoritate antecedit; at Rainutio, & quia maior ætate, & quia vno propinquitatis gradu propior. Nec magni momenti esse quod à Catharina afferatur, à se patrem suum Odoardum repræsentari: qui si viueret, ipsi Henrico succederet. Nam in huius regni successione nullus nunc est fratrum filijs cum patruis concursus, inter quos repræsentationis ratio haberi solet. quoniam hi, qui regnum petunt, omnes consobrini sunt, regis Henrici fratrum, ac fororum filij: quorum personas spectare oportet, non parentum, quas hic referre non possunt. Id quod etiam antiquissimis legibus à Gothorum temporibus semper in Hispania seruatum est. Quin etiam si daretur posse parentes referri, certè Maria, si in viuis esset, & Catharina Odoardi filia sexum virilem patris nullo modo possent repræsentare. Non enim ius naturæ patitur, nec iuris rationes, quæ naturæ vim imitantur, volunt, vt quæ re vera est fœmina, repræsentationis iure pro mare habeatur. Quare patrem filia non in sexu, sed in gradu repræsentabit. Proinde licet ipsarum pater Odoardus Isabellæ regis Philippi matri honore sexus anteponeretur, non tamen ipsius Odoardi filia regi Philippo itidem anteponerentur, quæ ex fœminis mares fieri nequeunt. Quòd si nullum ius repræsentationis est Mariæ, nec à Maria quidem in Rainutium filium transfundi vllum poterit. Quamobrè Portugaliæ successionē regi Philippo
iure

iure optimo deberi, quòd còpetitores omnes atque, insuper alium sexu, alium vincat propinquitate. Quinimmo leges ipsæ Portugalenses hoc ipsum statuunt, vt in istis successiõibus mas fœminæ, & mas nati maior cæteris omnibus præferatur. De Antonio se nihil velle dicere; quando leges omnes & instituta prohibent spurios non modò regnorum possessionem, sed ne aliorum quidem bonorũ hereditatem vllam ab intestato adire. Illum verò esse spurium ipsi Henrico magis notum atque testatum esse, quàm alijs. qui hoc ipsum à fratre suo Ludouico sæpe audierit: à quo rogatum Põtificem maximum etiam sciat, vt ijs legibus filium suum Antonium solueret, quæ prohibent spurium sacris initiari, dignitates ecclesiasticas obtinere, in testamentis hæredem nominari. Nec valere Ioannis huius nominis primi Portugalix regis exemplum, quòd spurius fuerit. Non enim iure sanguinis regnum obtinuit, sed à populo rex creatus est, cùm è regia stirpe nemo superstes esset non spurius, qui Ferdinando mortuo iure posset succedere. siquidem eius filia Beatrix spuria esse credebatur. At nunc regis Henrici cognatos extare, ad quos regni hereditas iure pertineat. Hæc, atque huiusmodi alia regis Philippi ministri de regis sui iure dicunt: eaque tum argumentis ductis ex naturæ initijs, & ex legum autoritatibus, tum præstantissimorum iurisperitorum sententijs confirmant. Quamobrem Henricum orant, vt quãdo regis Philippi causam omnium excellentissimorum iurisperitorum non solùm Castellanorum, sed etiam

etiam Portugalensium, & Italorum, atque aliarum nationum iudicio sine vlla dubitatione optimam & æquissimam esse videt, atq; ad cæterorum regnorum suorum incolumitatem, & totius reip. Christianæ tranquillitatem maximè referre, ipsius regis Catholici ius rectè, atq; extra iudicium perspiciat: & quod certum est in controuersiam non adducat: neve regem ab omni foro & iudicio liberum iurisconsultorum sententijs subijciat, & eorum, quorum animi facilimè possunt odio & amore permoueri. His ipsis argumentis, quæ à regis Catholici ministris afferebantur, vtens Carolus à Ruuere fatetur Emanuele Philibertum in hac regni petitione à rege Philippo vinci, quòd eo sit minor ætate, sed Catharinæ & Rainutio præferendū, quòd illam sexu, hunc antecedit propinquitate. At Dux Brigantinus contra regem Philippum & Emanuelē Philibertum pro Catharina repræsentationem, contra Rainutium propinquitatem vsurpat. Ferdinandus Farnesius verò repræsentationem contra regem Philippum & Emanuele Philibertum pro Rainutio, sexum contra Catharinam proponit. Sic in excellentissimorum iurisperitorum concilio regis Henrici iussu habito quæ à quoque dicebantur magno cum studio agitata; & de singulorum actionibus disputatum diu & permultum est. Ob quas concertationes rex Henricus, qui Portugalensibus natium regem esse cupiebat, & suo iure priuare quempiam nolebat, à multis persuasus est publicæ tranquillitatis causa, vir alioquin

D

quin

quin summæ castitatis & sanctitatis, vxorem ducere, si quos liberos susciperet, vnde omnem controuersiam tolleret. Quoniam verò oportebat absolui à Pontifice maximo lege, qua vetitum est sacris initiato vxorem habere, huius rei gratia constituit Odoardum Castrobancum nobilem Olyssiponensem ad Pontificem Romam mittere. verum interea in febrem incidit: è qua cum minimè recrearetur, sed continuata motiuncula in dies extabesceret, à nuptiarum cogitatione destitit, atque animum ad declarandum successorē suum aduertit. Postremò cum regis Philippi causam optimā esse cognosceret, à qua starent peritissimi legum, atq; animaduerneret Portugalenses à Castellanis alienos imperium regis Philippi non satis æquis animis accepturos, optimum factu iudicauit, vt regis Philippi actioni & Portugalensium voluntatibus vtilitatibusque consuleret, regnū, quod alioquin iure deberetur, certis quibusdam pactionibus illi tradere, quæ Portugalensium commoda respuerent. Et quidem rex Philippus ad omnem æquā pactionem veniebat, vt Portugalensium animos conciliaret, ac quietè regnum obtineret, & bellum contra Christianos & sui generis homines effugeret. Præstat enim de suo iure interdum aliquid remittere, quàm totum violenter velle retinere. Verum Procuratores ciuitatum postquàm hoc consilium regis Henrici olfacere inceperunt, vt illi obuiam irent, quæsiuere an extincta regia virili & legitima prole sibi liceret quæ vellent regem creare. Quibus

Quibus responsum est nō licere; quia regnum hæreditarium foret, non in populi arbitrio & potestate situm, partim dotale, partim armis partum. Interea pestilentia Olyssiponem incessit, malum durum & miserabile, omnibus commune, corporum contactu serpens. Quamobrem vitandæ contagionis causa in cœnobium S. Benedicti, quod vetus appellant, in suburbio secedit. vbi Christophorum Moram ad se accersit. ait velle se certis pactionibus regnum Philippo tradere: rogatq; an ius vllum procuratorium in hac re habeat. ille ius, quod habet, proferit. quod quia inualidum videtur, aliud à rege Philippo mitti postulat. quod mox missum est. Sæuiente autem quotidie magis pestilentia ex Olyssipones suburbio, mense Octobri, anno M. D. LXXIX. Almerinum proficiscitur, vt rebus regni melius illic consulat: ibiq; totius regni concilium indicit. Almerinum est pagus è regione Santarenæ (quod oppidum veteres Scalabium nominarunt) inter quæ flumen Tagus fluit XL. m. pas. supra Olyssiponem. Locus planus & patens, à dextra & sinistra collibus latè cinctus, frugum ferax, venatione amœnus, hyeme saluber, regijs ædibus nobilis: vbi Portugalensium reges hyberno tempore propter aëris temperationem vitam degere consueuerunt. Postquam Almerinum peruenit, cum Osunorum Duce & Christophoro Mora de pactionibus agere, quibus Portugalia regi Philippo tradatur. At rex Philippus sibi persuadens ob Portugalensium vetus in Castellanos odium sibi ius suum

D 2 armis

armis aliquando repetendum fore, ac doctus à facrarum rerum peritis licere sibi absque crimine bello persequi ius, quod iniuste sibi eripitur, quia Rex ex se iuste bello vindicare illatam iniuriam potest, quoniam superiorem iudicem non habet, qui damnum aestimet, lucroq; compenset, quæ ad bellum pertinerent comparari constituit. In Hispania multas peditum & equitum levis, ac grauis armaturæ copias cogi; Italos & Germanos conduci; ex Sicilia, Neapoli, Mediolano Hispanorum præsidiorum partem accersiri; arma, tormenta, comineatum vndiq; conuehi; magnam insuper classem nauium & triremium instrui, eo consilio, vt si rex Henricus è vita celsisset, & Portugalenses regnum ex æquo & bono dare sibi noluisent, ipsum armis peteret: sin aut Henricus in vita diutius fuisset, aut Portugalenses spontè sibi regnum dedissent, arma in religionis Christianæ hostes transferret; vel rem aliquam aliâ subiectis sibi populis gratam, quam fortuna, vel tempus suasisset, efficeret. Cæterum rex Henricus Almerini, vbi Antistites, Reguli, & ciuitatum Procuratores in indictum concilium ex regni more conuenerant, intentus Portugaliæ regi Philippo certis conditionibus tradere, vt ad illas facilius Portugalenses induceret, per Antonium Pineirum Episcopum Leriensem eos prius edocuit regni successionem omnium sapientum iudicio duos potissimè spectare, videlicet regem Philippum & Catharinam Ducis Brigantini vxorem: sed eorum vtrum magis spectet satis anceps & dubium adhuc esse. Verum
 si pro

si pro vtroque sententia feratur, magna vniuersæ
Portugalix pericula procreanda. Proinde videri si-
bi satius esse regnum quibusdam æquis conditio-
nibus regi Philippo tradi, si ante ipsum sobrinū su-
um mori sibi contigerit. Sic enim belli damna vita-
ri, & reip. Portugalensi optimè prouideri. Deinde
accipiens quòd procuratores ciuitatum intellige-
rent mandatum esse dumtaxat de concordia inter
regem Philippum & Catharinam agi, rursus per
eundem Pineirum eos edocuit de pactionibus esse
tantummodò inter regem Philippum & Portugalē-
ses agendum: illud verò quod de successionis iure
regis Philippi & Catharinæ in priore legatione dictū
est, ea ratione dictum fuisse, vt significaretur insta-
re diem, quo secundum regem Philippum sententia
feratur. Ideoq; se eos monere, ac magis magisque
suadere, vt vltro regi Philippo certis, & vtilibus cō-
ditionibus regnū concordissimè dedant. Eodē quoq;
tempore Catharinā per Paulū Alfonsum iurisperitū,
cuius opera multum utebatur, hortatus est ad faciē-
dam spontē, ad quam publicæ tranquillitatis causa
compelli poterat, cum rege Philippo & se dignam,
& suis rebus vtilem pactionem; quòd ab illo boni-
tate causæ, ab Antonio gratia apud populum vin-
ceretur. daturum se operam, vt inter eos conue-
niat. Quinetiam eodem die, quo animam exha-
lavit, per tres regni ministros hortatus est ciuitatis
Olyssiponensis Procuratores, vt aliarum ciuitatum
Procuratoribus persuaderent de pactionibus agere,
quibus regnum Philippo cum pace tradant. Sed
Catha-

Catharina de pactione nihil audire vult: & Procuratores, licet ad pactiones Antistites & Reguli veniant, quò magis probari regis Philippi causam audiunt, eò magis de suo iure instant, asserentes neminem debere sanguinis iure succedere, sed à Portugaliensi populo Portugalensium regem esse creandum: contenduntq; vt Henricus hoc ius populo esse pronunciet. Ad quorum rationem cum certa regis denuntiatio retardaretur, ministri regis Philippi regem Henricum etiam atque etiam hortari, ne ob plebem modo villo cunctaretur successorem suum ad præscriptam regni formulam renunciare. Proinde rex Henricus & à regis Catholici ministris, & à regni cura stimulatus volens omnino regem Philippum ante extremum vitæ suæ diem Portugaliæ regem in concilio denunciare, ac motum aliquem populi grauiorem timens, armatorum hominum manum ex vicinis agris contraxit, recusans copias, quas illi rex Philippus offerebat, vt earum præsidio rectus & suam dignitatem retineret, & de regni successione liberius iudicaret. Tunc ciuitatum Procuratores de creando rege questionem repetierunt, sperantes hoc interim spacio regem Henricum nulla facta regis ex certa formula denunciatione vi morbi consumptum occasurum: factam verò per Pineirum denunciationem irritam fore. Quibus biduum ad id denuo inquirendum datum est, contra nitentibus regis Philippi ministris: quòd istud erat moras trahere. omnem autem cunctationem procreare multa incommoda, & pericula posse. Interim nulla
alia

alia, quàm per Pineirum facta denunciatione, rex Henricus annis, curisq; cōfectus obiit pridie Kalend. Februarij, Ann. M. D. LXXX. ætatis verò suæ LXIX. Eo mortuo Gubernatores, quorum nomina paulò ante suum obitum diuulgauerat, regni gubernationem susceperunt, Georgius Almeida Archiepiscopus Olyssiponenſis, Ioannes Mascharenias, Franciscus Saa, Ioannes Telius, Didacus Lopus Sosa. Antonius, qui Scalabi latebat, confestim Olyssiponem ad tentandos multitudinis animos aduolauit: atq; à Senatu contendit, vt ius suum in regnum cognosceret. Qui ex consilio præferti Fernandi Pinæ magna authoritatis Senatoris respondit nullum experiundi iuris apud se locum esse, sed Gubernatorum sententijs & decretis obtemperandum, perinde vt iurati sunt sese facturos. atq; illi minimè conquiscenti, sed multa in reip. molienti deinde edixit, vt ex vrbe excederet; alioquin se alia via reip. pro suo munere consulturum. Quare commotus Antonius amicorum concilium conuocauit: in quo variæ sententiæ dictæ sunt. tandem in eam sententiam iuit, qua commonebatur ne quid contra Senatus consultum & Gubernatorum authoritatem faceret; vnde in se aliquā inuidiā concitaret. Itaq; vrbe egressus est, atque ad Bethlem templū nascenti Christo dicatum iuxta litus Tagi III. M. pass. Olyssipone distans, fluminis ostio propius, quasi patruo parentaturus abiit: ac mox illinc Scalabim redijt, imperans vni ex suis famulis, quem maximè audacem & fidum sibi cognouerat, vt Fernandum

nandum Pinam interficeret. Ille Fernandum obseruat, & obtruncat: comprehensus indicium profitetur: factusq; Senatoris necis reus omnium Gubernatorum regni Sententia suspendio damnatur. Cæterum significans Antonius velle se Gubernatorum decretis parere, quoniam his ipsis diebus tertie Pōtificis maximi litteræ ab Alexandro Frumento Georgio Almeida redditæ erant, quibus causæ de matris suæ nuptijs, sublati alijs, ipsi Alexāder & Georgius iudices constituebantur, institit vt constituti à Pōtifice maximo iudices de sua causa cognoscerent, ac iudicarent. Dux Osunorum & Christophorus Mora cæteriq; regis Philippi Legati singulis regni ordinibus regis sui litteras dederunt, & pro litterarum sententia postularunt, vt regnum spontè regi suo traderent, ad quem optimo iure peruenerit. Quo de iure dixerunt Rodericum Vaschiū ante ipsos planius disputaturum. Tum Vaschius, Rex Philippus, quippe princeps absolutæ politiæ, nullius sententiæ obnoxius est; sed ius suum ex se exequi potest, quod omnes legum periti optimum esse docēt, cū iudex nullus sit, cuius sententiæ stari debeat. Neq; enim Portugalenses possunt ea de re iudicare, de qua simul experiuntur. Nam asserunt regnum nulli iure successionis deferri debere, sed populo creandi regem ius esse. Nullum autem naturale, & ciuile ius patitur quempiam de suamet causa iudicare. Quinetiam rex Henricus, cui soli de successore iudicare fas erat, ipsi Philippo, cuius causam optimam esse perspexerat, regnum adiudicauit: suasitq;

suasitq; Catharinæ, & Portugalensibus cum illo pactionem aliquam facere. Adhæc neque regi Philippo, neque ipsis Portugalensibus conuenit sententiam ullam expectari. Nam dum tempus necessario dicendis sententijs & de nuptijs matris Antonij, & de populi authoritate, & de competitorum iuribus longissimè protrahitur, regis Philippi rebus periculum procreatur, & Portugalia sumptibus exhauritur, atque externorum hominum, qui aduocantur, moribus & doctrinis inficitur. Cæterum in potentissimi, iustissimi, ac sanctissimi regis ditione res Portugalensis amplissima & firmissima erit. Quamobrè si æquitatè, ac regis Henrici voluntatè sequentes regi Philippo debitum regnum ultro detulerint, sibi ipsis optimè consulent. Hæc eadem quoq; Valschius Olyssipone magistratibus copiosè disertèq; disseruit. Cuius orationem aliqui probauerunt; quidam ad respondendum spacium petierunt. Gubernatores autem responderunt optare se quidè regi Philippo, sed minimè posse regnum absq; certorum iudicum sententijs cuiquam deferre. Nec tamen, cum iurisperitos consulissent an ius procuratorium à ciuitatibus datum ijs, quos in regni concilium ad regem Henricum misissent, adhuc ratum foret, & responsum esset non ampliùs valere, quòd ad regem Henricum, non ad Gubernatores missi essent, sed ad novos conuentus agendos nouo iure procuratorio opus esse, nouum concilium indixere: nec constitutorum à rege Henrico iudicum nomina in apertum retulere, quòd priùs de nuptijs

E matris

matris Antonij, & de populi authoritate, quàm de competitorum iuribus agendum dicerent. Instant nihilominus regis Philippi ministri monendo, suadendo, pollicendo regnum poscere: nec solum vniuersos, sed etiam singulos regis sui causæ bonitatē docent: & beneficentiam, & quæ inter reges ipsos Henricum & Philippum conuenerant proponunt. quorum summa hæc ferè erat. Regem Philippum, si Portugalix regnum, alioquin iure propinquitatis sibi debitum, spontè tradatur, spondere nec priuilegia, neque immunitates ciuitatum Portugalensium vnquam imminuturum; non mores, non leges, non iudicia commutaturum; eadem regni, ac regix munera, eosdemq; ordines militares retenturum. Magistratus non nisi Portugalensibus mandaturum: eisdemque Ecclesiarum, & sacrorum militarium ordinum dignitates & fructus distributurum. Magistratus omnes ciuitatum etiam se absente semper eodem, quo nunc, modo mandandos. Nulla ratione vectigal vllum ex Ecclesijs Portugalensibus vnquam exacturum. Idem sacerdotum collegium ad res sacras faciendas, quod reliqui reges, Olyssipone conseruaturum. Dominatum in alios, & regia iura nulli, nisi Portugalensi ciui daturum; & quæ ab aliquo ad ius regium bona redierint, ea non sibi addicturum, sed illius propinquis, aut alijs benemerentibus impertiturum. De rebus iudiciarijs, & pecuniarijs eodem, quo nunc, ritu in Portugalia iudicandum. In nummis non alia signa, quàm quibus Portugalensium reges semper

vñ

vfi sunt, insignia impressurum. In arcium præsidij non nisi Portugalenses collocaturum. Ad instruendam classem, cogendum exercitum, administrandum bellum pro rep. Portugalensi Portugalensium opera vsurum, nauarchorum, militum, ducum. In Portugalia quoad licuerit ab aliorum regnorum cura mansurum: nec hospitia, quæ in Castella assollet, imperaturum: sed morem in hoc Portugalensem obseruaturum. Cùm abire contigerit, vnum aliquem ex ipsis Portugalensibus, aut cognatum aliquem & affinem suum regendis pro se regni gubernaculis relicturum. nec non filium suum stirpis regiae principem inter Portugalenses educandum è Castella in Portugalam, ni quid obstiterit, missurum. Portugalensium ordinum conuentus de regni negocijs non nisi in Portugalia acturum. Vbicunq; locorum fuerit, Portugalenses homines apud se habiturum, per quos regni negocia conficiantur: & quæ ab his mandanda sint tabulis, Portugalensi lingua mandentur. Se more Dominorum Burgundorum Portugalenses mares in famulatum suum recepturum: reginam verò Portugalenses feminas; easque deinde in matrimonio locaturum. At Portugalensium regum more nobilium filios post duodecimum ætatis annum apud se pro familiarum ordinibus, non nobiles in regijs classibus stipendia (quæ Portugalenses moradias appellant) merituos: ac singulis annis CC. Portugalenses certis stipendijs in suum famulatum adscripturum. Portoria confinium Portugaliæ & Castellæ sublatum. Res

ad vitæ vsum necessarias ex Castella Portugalen-
sibus, quantum vtrorumque populorum commo-
da ferent, suppeditaturum. Postremò CCC. m. du-
catorum in vsum pauperum, & captiuorum ipsis
largiturum. Quas cōditiones aduersarij regis Phi-
lippi calatas voluissent, ne qua eius benignitas ap-
pareret. Nec acceptæ sunt tamen, quòd in diuer-
sas partes diuisi essent. Quamuis enim esset omniū
eadem voluntas natiuum regem habendi, tamen
cū id fieri non posset, aut quamægerrimè posset,
diuersæ voluntates, & varia pro cuiusque libidine
studia exitere. Antonium plebei amplectebantur,
& nobiles aliquot: in quibus Ioannes Portugalius
Episcopus Igæditanientis, Franciscus Portugalius
Comes Viminosensis, Emanuel Portugalius, Didac-
cus Menesius, Emanuel Sylua, Didacus Botellius.
Pauci Catharinæ Ducis Brigantini vxori studebant,
scilicet, necessarij, & consanguinei, quiq; à Duce
Brigantino beneficia habebant, vel accepturos se
aliquando sperabant. Maxima pars nobilium vel
cernentes vires Portugalsium modicas esse, qui-
bus regi Philippo resisteretur, vel eius causam pro-
bantes, vel magnorum præmiorū spe adducti eius
partes sequebantur, clam tamen, quia plebis inui-
diam ob commune in Castellanos odium extime-
scebant. Sed & nonnulli, qui publicam pacem &
tranquillitatem amare videbantur, iuri standum
aiebant. Cuius quidem charitatis specie bonorum
& simplicium hominum volūtates à rege Philippo
facilius alienabant. Quidam præterea censebant
nouum

*Igædit.
vulgò
de la
Guarda.*

nouum regem creandum. Quidam etiam nulli ad dicti, atque ab omni negotio remoti in pagis, ac villis exitum rei expectabant. Nec Gubernatorum idem erat omnium sensus, eademque voluntas. Nā Georgius Almeida indifferens erat, neque vllam in partem mouebatur: Ioannes Telijs contra regem Philippum stabat: reliqui pro rege Philippo; sed, ne in populi offensionem incurrerent, à rege Philippo alieniores se simulabāt. Verūm vt regno prouidere viderentur, Portugaliæ partes suis quamque du- cibis custodiendas distribuerunt. Cuius rei gratia libet Portugaliā in suas partes diuidere. Portu- galiam Scriptores in Transaganam, Cistaganam, *Transf. vulgò Alente- jo.* & Interamnem discreuerunt. Transagana ea pars est, quæ fluminibus Tago & Ana, finibusque Ca- stellæ continetur, quos Senerus fluuius exiguus ter- minat: atque à meridie coniunctam habet Algar- biorum, qui olim Turdetani appellati sunt, regio- *Senerus vulgò Senore.* nem, quæ Oceano abluitur. Cistagana verò flumi- nibus Tago & Durio, atque occidentali Oceano clauditur. At Interamne inter flumina Durium & Minium iacet, ecclesia Bracarensi illustris; à qua etiam Callæcia Bracarensis nominatur: eique con- tinens est regio Transmontana; in qua Brigantium est oppidum insigne, amplissimi Ducatus caput. Quare Portugalia nec totam Lusitaniā continet (nam extrema Castella pars Lusitaniæ est) & partē Hispaniæ Tarraconensis amplectitur, nimirum eā, quam Callæciam Bracarensem nominari diximus. Igitur Gubernatores Interamnem Ludouico Brito, *Transf.*

Transmontanam Ferdinando Menesio, Transtagana-
nam Didaco Menesio, Algarbium Odoardo Me-
nesio, & quod in Transtagana oppidum est, Ceto-
brica olim appellatum, nunc Setubal, situm ad si-
num, quem in terram influens ab occidente Sole
Oceanus efficit, Antonio Munio Barreto comen-
darunt. In vrbs Olyssipones, & fluminis Tagi, &
vicinarum maritimarum orarum, quæ in Cistaga-
na sunt, custodia, cui Petrus Cugna à rege Henri-
co præpositus fuerat, posuerunt etiam Emanuelem
Portugaliū & Tristanum Vasaū: quem etiam
præfecere arci, cui nomen à sancto Iuliano, in ipsis
Tagi faucibus. Munitioni, quam contra hanc ar-
cem è terra & lignis extruxerant in parua, humili,
& arenosa insula, Cauezzasica nominata, Petrum
Barbum præposuerunt. Quæ extra fauces est intra
magnum promontorium arx ad oppidum, quod
Calsale vocant, à quo ipsum promontorium postea
nomen accepit, eam Antonio Castrensi concedi-
derunt. At turres, alteram, quam Bethlem nun-
cupant à templo, quod nascenti Christo dicatum
diximus intra fluminis claustra in dextra ripa, Fer-
dinando Syluio, alteram, quam veterem appellat,
è regione Bethlem in altera fluminis ripa Roderico
Laurentio Tauaræ custodiendas tradiderunt. Præ-
terea Conimbricam Petro Guedio Sosæ, Lauarem
Ioanni Vasconselæ, Lamecam Francisco Almeida,
oppida in Cistagana; atque alia alijs defendenda
commiserunt. Adhæc Franciscum Barretum in Gal-
liam miserunt ad reginam Catharinam & Henricū
eius

*Lauare**vulgò**Aueiro**Lameca**vulgò**Lamego*

eius filium III. Gallorum regem: quibus Portugalē-
 sium regis Henrici mortem nunciaret, & rerum sta-
 tum exponeret, ac fidem faceret Portugaliæ Guber-
 natores in denūciando rege nulli iniuriam facturos;
 simulq; auxilia posceret contra eos, qui vi vellent
 Portugalam petere. & Petrum Dorum, qui Olyf-
 sipone Consul Gallorum erat, illi socium adiūxere,
 quocum multa secretò transegerant. mandarunt
 etiam quoscunque posset milites Gallos in reditu
 secum conducere. Insuper optimatum concilium
 instituerunt, in quo de defendendo regno consilia
 haberentur. Hac vsi diligentia Gubernatores visi
 sunt regnum velle munire, ac contra regem Philip-
 pum arma parare: tamen neq; ad conducendos mi-
 lites Barreto pecuniam dederunt, nec præfectis re-
 gionum, oppidorum, & arcium ea, quæ ad pro-
 pugnationem & defensionem vsui forent, suggesse-
 runt, hinc populi Portugalensis odium, hinc regis
 Philippi potentiam & offensionem reformidantes.
 vnde nec cum pace illi regnum detulere, nec bello
 regni possessione prohibuere, neutri ob id chari. Et
 rex Philippus post nunciatam regis Henrici mortē
 creauit imperatorem exercitus Ferdinandum Al-
 uarum Toletanum Ducem Albæ, vnum ex prima-
 rijs totius Hispaniæ, ac rei militaris scientissimum
 virum: eumque iussit in extremos fines Castellæ,
 quibuscū Portugalia continens est, proficisci, ibiq;
 totum exercitum maturissimè contrahere. Tum
 etiam ad Alfonsum Peretium Gusmanum cogno-
 mento Bonum Ducē Metimnæ Sidoniæ in Batrica
 confi-

*Metimna
 Sidonia
 olim. effy-
 la.*

confini Algarbijs; & ad Petrum **Portocarrerum**
 Marchionem Villænouæ, & ad Petrum Velasum
Paxaug. *hodie* *Badajos.* Paxaugustæ præfectum, & ad Beltranum à Cuenca
 Alburquequensium Ducem in extrema Castella
 Transtaganis Portugalensibus finitimos; & ad Pe-
Caurita *hodie* *Coria.* trum Gartiam Episcopum Cauritanum, & ad Ro-
 dericum Paccecum Marchionē Seralui, & ad Hie-
Mirobr. *hodie* *Ciudad* *Rodrigo.* ronymum Fontium præfectum Mirobricæ partim
 in nouæ, partim in veteris Castellæ finibus vicinos
 Cistaganis; & ad Didacum Henrichium Gusmanū
 Comitem Albæ, & ad Io. Alfonsum Pimentelium
Beneuen- *te olim* *Maliaca.* Comitem Beneuentanum in eisdem veteris Castel-
 læ finibus Trāsmontanis propinquos; & ad Gaspa-
 rem Portocarrerum Comitem Montis regij, & ad
 Gartiam Sarmētum Sotomaiorem Dominum Sal-
 uaterræ, & ad Didacum Thurecrematum Episco-
Tyde *vulgò* *Tuy.* pum Tydensē, & ad Petrum Fernandum Castrē-
 sem Comitem Lemi in Callæcia Interamnenſibus
 proximos scripsit, vt quas possent copias cogerent,
 atque in armis ad omnem casum paratas haberent:
 rem frumentariam curarent, neque in Portugaliā
 vlla cibaria inferri sinerent: flumina, loca, regiones,
 oppida, arces Portugaliæ benè perspicerent, ac dili-
 genter fines suos custodirent; & **Portugalenses** om-
 nes, quotquot in fines suos introirent, obseruarent,
 qui, cur, qua via, ac quomodo aduenirent. cæterum
 amicè & beneuolè se cum Portugalensibus gererēt,
 & de æquitate suæ causæ illos docerent, ac promif-
 sis & beneficijs allicerent. Atque etiam statuit **Pax-**
 augustam ire, oppidum in extrema Castella Por-
 tugalix

tugalix proximum, vbi exercitus componendus erat, vt vel amicè, aut vi Portugalix possessionem adiret; ac si vis vlla adhibenda esset, illam sua præsentia temperaret. Nam omnino ius suum exequi statuerat, bono tamen modo, vt neque in negligendo stoliditas, neque in repetendo reprehenderetur acerbitas. Itaque III. Non. Martij Madridio profiscitur: ac reginam cum liberis subsequi iubet. atq; ad ædem S. Mariæ ad Aquas Lupias veniunt: in qua regi Henrico iusta magnificè persoluunt. At Portugalix Gubernatores vt regem Philippum Madridio profectum, & Portugalix finibus appropinquare audierunt, Gasparem Casalem Episcopum Conimbricensem & Emanuelem Melum Oratores ei obuiam miserunt, qui illum orarent, vt ne armis Portugaliam peteret, sed denunciationem expectaret, quæ in totius regni concilio quam proximè fieret. Oratores regem Philippum ad Aquas Lupias conuenere; atque illi quæ in mandatis habebant exposuerunt, vt armis abstineret, denunciationem expectaret. Gubernatoribus fas non esse regnum cui velint ipsi tradere, sed cui delecti à rege Henrico iudices adiudicauerint. idque eos se facturos iurasse. Sin aliter agerent, non modò iusiurandum violaturos, sed etiam regni competitoribus iniuriâ facturos. atque etiam si vellent asque iudicibus illi regnum tradere, nihilominus absque totius regni concilio id facere nullo pacto posse. Ad hæc æquū esse ipsum regem Philippum vnà cum alijs competitoribus causam ijs iudicibus committere, qui inter

*Madrid.
olim Mā-
tua Car-
pentano-
rum.*

F

iplos

ipſos conueniant. Quibus rex Philippus reſpondit, Laudare ſe Gubernatorum in remp. ſtudio, quod ex ipſa legatione intelligit, atq; optare ſibi fas eſſe ipſorum poſtulis ſatisfacere, ſicut omnibus in rebus morem geret, quarum æqua, & honeſta erit poſtulatione: tamen neque ius ſuum ferre, neque regni utilitatem pati, vt illis de his, quæ poſtulant, obſequatur. Verùm illos pro æquo & bono facturos, ſi, cùm ius ſuum optimum, & iudicem cauſæ nullum eſſe idoneum agnoſcant, cuius ſententiæ ſtare oporteat, regnum ſibi deferent, nec moram vllam interponent; quando omnis mora magnum rebus ſuis procreare periculum poteſt. Nec iuriſiurandi religionem, qua ſe aſtrictos aiunt, vllam cenſeri: quoniam vanum eſt iuriſiurandum, quo quis iurat ſe id facturum, quod fieri non poteſt, aut certè non debet. Itaque ſe illis ſuadere, vt omni mora reiecta ſibi regni à Deo dati poſſeſſionem tradant, & fidẽ publicam dent. id quod etiam rex Henricus faciendum ab illis iudicauit. Debere autem ipſos & ad Dei voluntatem, & ad regis Henrici ſententiam ſuos ſenſus & animos accommodare. Quod ſi fecerint, quemadmodum eos facturos pro ipſorum probitate & prudentia ſperat, ſe illos multis beneficijs ornaturum, non ſolùm ijs, quæ à Duce Oſunæ propoſita ſunt, ſed etiam alijs, quæ honeſta, & opportuna fuerint. Deinde poſt datam funeri auunculi operam ex Aquis Lupijs profectus, Emeritam petit. Eumque ruriſum legati Emeritæ conueniunt: eadem, quæ antè, poſcunt, vt bello ſuperfedeat, cõuentum

*Emerita
vulgò
Merida.*

uentum regni fieri patiatur, renunciationem expectet. Gubernatores non posse aliter illi regnum deferre & iurisiurandi propria religione, & aliorum ratione. Quos rex iisdem responsis, quæ antè dederat, à se dimisit. Ac mox Emerita discedens, Paxaugustam III. m. pass. hinc à Portugaliæ finibus peruenit, vsus lentis itineribus, vt spacium esset contrahendi exercitus. Et Portugaliæ Gubernatores quatuor (nam quintum Ioannem Telium Collegam Olyssiponem præmiserant, qui eius Ciuitatis rebus præesset) initio mensis Iunij ex Almerino Setubal abierunt. vbi totius regni concilium indixere. A quorum discessu Antonius liberiùs sese gerere cœpit, non iudicum sententias, non Gubernatorum decreta, non denunciationem vllam regis expectare: conuenticula habere, Procuratores ciuitatum à concilio retrahere, nunc hos, nunc illos ambire, blanda oratione quemque appellare, &, si se regem fecerint, magna omnibus præmia polliceri. Eius studia rex Philippus intelligens, & Gubernatorum dubios animos cognoscens, ad Ferdinandum Aluarum Toletanum scripsit, qui Ellerenæ haud longè hinc erat, ex vicinis Bæticæ maritimis oris, & stationibus copias colligens, ac res belli proprias administrans, vt properaret omnes copias contrahere, atq; exercitum ad Paxaugustam componere. Toletanus Ferdinandum filium cum Sancio Auila militiae magistro & Baptista Antonello architecto Paxaugustam ad deligendum castris locum misit: ipse interim militum numerū iniuit. Recensita sunt

II. m. equitum, peditum XXII. m. præter VI. m. rusticanorum hominum, qui ferramenta ferebant cùm ad alios vsus, tùm ad sternendam viam, per quam bellica tormenta pertraherentur. Hispanorum accersitorum ex præsijs Mediolani & Neapolis III. circiter m. quorum præfecti Petrus Sotomaior, & Petrus Gonzales Mendoza: collectorum verò in Hispania X. m. quibus præerant Ludouicus Henrichius, Gabriel Nignus, Antonius Morena, Petrus Ayala. Germanorum III. m. & D. sub imperio Comitris Hieronymi Lodronis. Italicorum III. m. & D. quorum præfecti Prosper Columna, Vincentius Caraffa, Carolus Spinellus Petro Medici parebant. Etsi enim longè plures Itali & Germani nauibus aduecti fuerant, tamen ad Calpem iuxta fretum Herculeum in statuis magnam eorum partem vis morbi absumpserat. Postquàm Ferdinandus filius locum castris delegit in planitie, quæ inter flumina Seuerum & Anam iacet, vulgari nomine Cantillana, eò exercitum conduxit, & tormenta ænea LIII. cum magna copia pulueris tormentarij, quibus Franciscus Alaua præerat; & ad pertrahenda ipsa tormenta carros D. & ad ferenda cibaria carros ad VI. m. Simulq; Aluarum Bazanum regie classis præfectum litteris monitum fecit, vt classem ad omne imperium instructam paratamq; haberet. At Portugaliæ Gubernatores nec regi Philippo regnum deferunt, nec se contra eius arma muniunt, neq; de defensione, neque de deditione cogitant. Et concilium, quod de regni defensione instituerant,

*Calpe
vulgò
Gibral-
tar.*

stituerant, non ad prouidendas res bello necessarias, sed ad excitandos populorum animos contra Castellanos frequenter conuocatur. In quo multus est Martinus quidam Gonzales, vir sacris initiatus: cuius consilio litteræ ad Episcopos ciuitatum, & religiosarum familiarum præfectos scriptæ fuerant, vt concionatores in templis populum ad defendendam communem libertatem & salutem adhortarentur. Vnde à multis sæpe contra regem Philippum & Castellanos habitæ sunt orationes non pietatis & religionis, sed odiorum & iniuriarum plenæ. Rex Philippus rebus omnibus ad bellum comparatis, tametsi populi Portugalensis temeritas, Gubernatorum tarditas, Antonij machinationes omnem cunctationem reiicere, quæ multorum bonorum sæpe parit amissionem, & exercitum in Portugaliā quamprimū immittere suadent, tamen priusquā id faciat, vt æquitatem sequi, non vim suscipere videatur, Gubernatores præmonet se posthac nihil cunctaturum, quin in Portugaliā à Deo sibi datam ingrediatur; cū omnis temporis dilatio plena periculorum sit. Sole clarius esse astu peti à se vt denunciationem expectet, vt interim auxilia contra se comparent, vel casus aliquis interueniat, qui regni possessionem impediāt. Regni concilium in mensem Maium ab ipsis indictum: mensem Maium elapsū esse, ac nullosdum Antistites, aut Dynastas, aut ciuitatum Procuratores conuenisse. quinimmo permultas ciuitates adhuc nullos procuratores fecisse, nec facere velle. Se non ignorare

rare quæ à quibusdam Portugalensibus cum exteris
 hominibus contra se agantur. Sed neque sibi vtile
 classem, cum nauigationis idoneum tempus est, in-
 clusam in portu contineri, non maritimas oras Por-
 tugalix custodiri, non exterorum auxilia prohiberi,
 non inimicorum accessum vetari: neque æquum
 esse ingentem exercitum in eisdem locis diutius re-
 tineri, cibaria frustra consumi, fideles sibi Castella-
 nos pluribus incommodis affici, ac bonos Portuga-
 lenses sibi legitimo domino parere volentes ab im-
 probis ciuibus vexari, qui reip. tranquillitatem malis
 consilijs, & conatibus perturbant. Testificari tamẽ
 se nihil cuiquam hostile facturum, qui non ad vici-
 scendum, sed ad benè promerendum de suis Por-
 tugalensibus veniat. Quòd si qui fortè insolenter,
 & sine iudicio restiterint, eos debellaturũ; reliquos
 summa charitate amplexurum, ac singularibus be-
 neficijs ornaturum. Atque ad præfectos regionum
 & vrbium vicinarum Portugalix scribit, vt finitimis
 Portugalensibus ius suum in Portugalix regnum
 explicant, & Gubernatorum tarditatem ostendant:
 suam quoque mentem, & armorum consilium ex-
 primant, quòd contra perniciosos homines tantũ
 capiantur: postremò commoneant, vt se verum &
 legitimum regem haud repugnanter recipiant, à
 quo multis & magnis beneficijs afficiendi sint; non
 factiosorum hominum consilia sequantur, quibus
 aliquando se, ac sua bona perditum eant. Ipsosque
 præfectos facit procuratores, qui eos, qui se dedāt,
 in suam ditionem accipiant, & immunitatibus suo
 nomi-

nomine donent. Itemq; per legatos suos Portugaliae Gubernatoribus denunciauit, vt sibi regnum traderent, ad quem probè scirent ab Henrici morte iure optimo peruenisse: neve posthàc regni bona, & vectigalia administrarent; quorum administratio ad se regem pertineat. Caterùm nullo se modo laturum, vt illorum cunctatione ius suum deterius fiat. Sed Gubernatores huic ter à legatis factae denunciationi nequaquam paruere. Tunc ad Eluios, & Oliuentinos proximos populos Petrum Velascum Paxaugustae praefectum cum litteris & iure procuratorio in suam ditionem illos accipiendi misit. Is primò Eluem VIII. m. pass. à Paxaugusta iuit: eamque ingressus, in templum, quod iuxta portam est, concessit: vnde Episcopo, & vrbis praefecto, ac Senatui significauit se regis ad eos litteras ferre. Illi omnes eodem in templo conuenere: ac lectis litteris, quibus monebantur regē Philippum pro vero & legitimo rege Portugaliae habere, ac fidem huius rei publicam Petro Velasco suo procuratori dare, vt in diuersas partes diuisi erant, sic in diuersas sententias discessere. Quidam obtemperandum, quidam repugnandum, quidam à Gubernatoribus responsum expectandum aiebant. Sed cùm Velascus tantum diem vnum ad consultandum concederet, Episcopus omnium nomine poposcit regis exercitum ad urbem propius adduci, vt apud Gubernatores & ceteros Portugalenses iustam deditiois excusationem haberent. Cui postulationi Velascus non concedendum ostendit, quòd exercitus facillè adduci, sed

sed sine multis ipsorum damnis & incommodis reduci non posset; quòd maiorem gratiam à rege sponte se, quàm vlla cum tergiversatione dando consequerentur; quòd alijs ciuitatibus exemplum nò bonum daretur, quæ idem sibi concedi etiam peterent; quòd omnis tyrannidis species, quæ vim habet cū iniustitia coniunctam, à rege Philippo abesse debet, qui ius suum postulat. Sed dum noctis spacium ad deliberandum capiunt, Antonius Melus vrbs præfectus in arce Velasum ad cœnam inuitat; atque interim Gasparem Britum clam ad Ioannem Aceuedum Portugaliæ Architalassum, XVIII. m. pass. hinc, Extremutium mittit flagitatum contra regis Philippi arma subsidium. Quam rem Velasus ab amicis, & speculatoribus, quos circa urbem disposuerat, cognoscens, statim ad Ferdinandum Aluarum Toletanum scripsit, vt manum expeditorum militum ad se quamcitissimè mitteret, quæ ab vrbs præfecto accersita subsidia præueniret. Aceuedus DC. pedites, & XL. equites; Toletanus II. m. peditum, & CC. equites eadem nocte misit. Vbi dies illuxit, conuocata concione Velasus conquestus est se hospitalitatis specie prodi, & cōtra regem Philippum copias in ipso consultationis tempore acciri. Tum eos cōmonuit ne à iusto & bono vel proprijs, vel alienis odijs impediantur: à se contra maleuolorum audaciam satis esse prouisum. Dum hæc diceret, multa signa cohortium à regijs castris ad urbem appropinquantium conspecta sunt. Vnde & verbis amicorum, & metu signorum victis Antonij
Meli

Archita-
lassus
vulgò
Almirã-
te.

Meli & suorum animis, regis *Philippi* nomen tota urbe conclamatum est. Quamobrem cohortes regiae in castra reuerterunt, & quas *Accevedus* mittebat, cū *M.D.* pass. abessent, regredi admonitæ sunt. quæ hoc indignantes *Eluiorum* agrum, quô vadebant, hostiliter vastarunt. *Eluij* *Paxaugustam* iuerunt fidem regi *Philippo* datum: à quo humanissimè accepti, ac magnis beneficijs affecti sunt. *Velasus* ad *Oliuentinos* profectus est. In his etsi nonnulli à rege *Philippo*, tamen plures à *Catharina Ducis Brigantini* vxore erant: atque in his *Aluarus Pereira* præfectus arcis pro patre suo *Comite Tentubalensi*. Proinde *Velasum* primò intra urbem recipere noluerunt: deinde receptum primores ciuitatis non modò audire defugerunt, sed etià comprehendere voluerunt. Ille ad plebem, quæ in foro erat, huiuscemodi orationem habuit. *Mex rex Philippus* ad vos *Oliuentini* mittit, quos suo nomine moneam, vt sibi vero ac legitimo regi parere velitis, ad quem à regis *Henrici* morte, cui sanguinis cognatione proximus erat, *Portugalia* iure peruenit. Quod quidem multis de causis facere debetis. Primùm quia æquum est obedire legitimo regi. & regem *Philippum* regis *Henrici* legitimum successorem esse tum ipsiusmet regis *Henrici* sententia, & voluntas declarauit, tum omnium ferè iurisperitorum scripta testantur. Deinde quia parendo non tantùm vestris vtilitatibus, sed etiam totius regni tranquillitati consulētis. siquidem vestrum exemplum reliquæ ciuitates imitabuntur. Si obedi-

G

dientes

dientes eritis, pax totius regni sequetur; sin resistetis, bellum incendetis, quod sine dubio vobis omnium pessimè cesserit. Nam vos Oliuentini, qui belli periculis primi expositi estis, mala, quæ bellum afferre solet, primi subibitis. vos agros vastari, prædas agi, tecta incendi, mortales capi, & (quod morte grauius est) vestros liberos & vxores quæ victori collibuerit pati ingenti, vestro cum dolore cernetis. alij mox vestro malo sapere didicerint. Nec equidem video quæ vobis opes sint ad defendendam urbem contra maximum & fortissimum exercitum. Non fossæ, non mœnia, non munitiones vllæ, per quas miles non in urbem irrumpat, non arces, non tormenta, non auxilia, quibus aduersariorum copias à vestris ædibus arceatis. Cur Oliuentini præcipites vos ac vestros liberos, & vxores in tantas miseras frustra contra diuina, & humana iura proijcere vultis potius, quàm vestri regis gratiam inire; qui non solum vestras veteres immunitates & priuilegia confirmabit, sed nouis etiam vos honoribus & beneficijs augebit? Nec video cur vllam sententiam Gubernatorum expectetis: quorum nimiam tarditatem sibi & alijs inutilem vos ipsi videtis; qui etiam benè perspicitis à regis Henrici morte Portugaliæ ad regem Philippum legibus obuénisse; & detrimentosum ei esse tantum exercitum in eisdem locis in nullum vsum diutius continere, atque interim perniciosis hominibus tempus dare contra se externos homines aduocandi. Quamobrem Oliuentini ego, cui vestra salus æquè porro,

porrò, ac meorum ciuium curæ est, vos oro & ob-
testor, vt vobis sapiatis, nec contra verum & iustū
nitamini, ac regis **Philippi** beneficentia vti malitis,
quàm vim eius temere experiri. Mihi ipse rex **Phi-**
lippus ius procuratorium dedit vos in suam ditionem
accipiendi, & vestra, & quæ à Duce **Osunæ**
proposita sunt priuilegia suo nomine confirmandi.
Hac oratione cū plebis assensionem captasset,
multis comitantibus ad propinquum locum abiit,
in quem multos nobiles cōuenisse audiebat. quibus
idem suasisit. ac vix dicendi finem fecerat, cū **M.**
Antonius Iustinianus Ligur alta voce regem **Philip-**
pum regem **Portugalix** conclamauit: ac mox vna,
eademque voce omnes eundem **Portugalix** regē
conclamarunt. Ad quam vocem qui se in tectis ab-
diderant principes ciuitatis, in forum egressi sunt,
atque in loco sacro fidem omnes suam regi **Philip-**
po dederunt. Altero die **Nunius Marinus** arcem,
quam pro **Aluaro Pereira** tenebat, **Velasco** tradi-
dit. Ac rex **Philippus** **Oliuentinos** eisdem, quibus
Eluios, immunitatibus & priuilegijs donauit. Ho-
rum deditio, quorum exitum omnes expectabāt,
permagnum momentum ad attrahendas alias ciui-
tates in ditionem regis **Philippi** attulit. Tunc **Por-**
talegre & **Campus Maior** vicinæ vrbes, in quas
Hieronymus Mendoza cum eisdem litteris & iure
procuratorio, quibuscum **Velasco**, missus fuerat,
in regis **Philippi** ditionem datæ sunt; ac pleraque
aliæ in extremis **Portugalix** finibus. At arx oppidi,
quod à loci amœnitate vulgò **Villamuitiosam** no-

minant, Ducis Brigantini, ab habitatoribus propter contagionem deserti XVIII. m. pass. à Cantillana Paxaugultæ, sic capta est. Qui tormentis in arce præerat, notus erat Cisnero cuidam in castris regis Philippi. Is illi multa pollicendo persuasit, vt se nocte media in arcem intromitteret. Itaque cum delecta manu, quam Sancius Auila ducebat, tempesta nocte ad Villamuitiosam accessit, ac quarta vigilia in fossam, quæ arcem cingit, insiliit, & ex ea scalas ad arcis murum apposuit, ac summum cepit. Arcis custos dormiebat; sed multo militum & armorum strepitu excitatus ex somno comprehensum vnà cum arce se sensit. Quæ res vniuersis Duci Brigantino subiectis populis magnum terrorem iniecit: qui magnum defensionis suæ præsidium in hac arce habere putauerant. Dum hæc in Portugaliæ finibus geruntur, Antonius Scalabi familiares & amicos suos ad visendum locum inuitat, qui vrbs propugnaculo designabatur in tumulo, qui iunctus montibus (nam oppidum in collibus positum est) Tago imminet. In quem cum populus conuenisset, tutor quidam, sicut instructus erat, eductum è vagina gladium, in cuius cuspide pannum lineum candidi coloris infixerat, altè dextra extulit, ac magna voce Antonium regem acclamauit. quam vocem reliqui excipientes similiter illum regem acclamarunt, nequicquam eos inhibente oppidi præfecto. Ac mox cum eadem acclamatione Antonium in Curiam fractis foribus, quas quidam Senatores occluserant, introduxerunt, & fidem illi publice dederunt.

dederunt. Quod facinus nonnulli in Antonio quidem vt inconsideratum damnarunt, quòd causa cecidisset ex violato iureiurando, quo iurauerat se Gubernatorum decretis obtemperaturum: in Scalabitanis verò, vt intempestiuum reprehenderunt, quòd vel multo antè factum oportuisset, vt tempus ad muniendum se contra regis Philippi exercitum fuisset, vel expectandum quoad regis exercitus in Portugaliæ fines ingressus esset, vt iusta causa Portugalenses ad arma pro communi defensione concitasse videretur. nunc regis Philippi causam ab Antonij & Scalabitanorū audacia factam esse æquiorē: illiq; datam ansam ad inferenda infensa signa in Portugaliā. Plures tamen factum laudarunt, & Antonium ad capiendum bellum contra regem Philippum impulerunt; inprimis Episcopus Igadi-taniensis, & Comes Viminofensis. quorum oratio his rationibus nitebatur. Quòd ab innato odio cōtra Castellanos Portugalēses omnes sub eius imperium vna mente animoq; concurrerent. atq; etiam Galli, Belgæ, Angli Hispanorum odio Portugalē-sibus auxilio venirent. præterea Turca cum classe vel Siciliam, vel Italiam inuadens regis Philippi vi-res distraheret, atque imbecilliores redderet. proinde regem Philippū in Portugalia magnum exercitum habere multo tempore non posse. quem verò nunc habet, paruum, & inertem esse, ex Hispanis tyronibus confectum, ac multorum Italarum & Germanorum morte extenuatum. Atque ex his, qui cōtra regem Philippum Antonium opposuere, quidam

quidam illi suaserunt, ut defensoris nomen, non regis acciperet. quoniam defensoris nomen in tot defensionibus & motibus omnium auribus iucundius foret; & posset, si res aliquando postularet, sine ulla indignitate deponi: non item regis; quod, præterquam quòd arrogantius est, si bellum malè cederet, nunquam pateretur in eas condiciones eum descendere, in quas rerum necessitas cogeret. quòd si ex sententia res succederet, tunc omnes illi ultro regis nomen & insignia delaturos. Verùm Antonius etsi primò professus est se non regem, sed communis libertatis defensorem esse, tamen deinde vel imprudentium hominum consilia sequens, vel sese nimium diligens, relicto defensoris, nomen regis accepit. Equidem leues homines ambitio facillè vincit. Vbi verò rex à Scalabitanis est factus, in animo habuit Setubal ad Gubernatores ire, quos sibi adiungeret: sed mutata deinde sententia, non Setubal, sed Olyssiponem ire decreuit, caput regni, fretus ciuium voluntatibus, quorum exemplo alias ciuitates ad se attraheret. Quod Senatus Olyssiponensis intelligens, Ioannem Telium, quem à collegis missum ex Almerino Olyssiponem suprà memorauimus, id temporis commorantem Bethlem admonuit, ut in urbem veniret, atque Antonium introitu prohiberet, quem cum desiderio plebes expectaret. sibi satis virium non esse ad resistendum: & Petrum Cugnam urbis præfectum in ea defendenda remissorem factum; quòd urbis defensionē ad Gubernatorem pertinere diceret; ipse nec Antonio contraire,

PORTUGALIA.

51

traire, nec de suo munere argui vellet. Teli^{us}, quòd
item nec Antonio aduersari vellet, nec videri suo
muneri deesse, in urbem concedere noluit, sed ex
vicinis agris milites cogi iussit. è quibus vna dum-
taxat contracta cohors. cuius ducem Bartholomæ-
um Oliueram D. pass. extra urbem via, quæ Scala-
bim est, considerare iussit; neque vllam rem aliam il-
li certam mandauit. ac Franciscum Telium fratrē
suum cum Didaco Sosa venienti Antonio obuiam
misit: cui suaderent nomen regis deponere, nec cō-
tra Gubernatorum voluntatem quicquam facere.
Qui Antonio D. pass. ab vrbe obuiam facti, post
consalutationem quæ Ioannes Teli^{us} mandauerat
loquuti sunt. Ad quæ mox responsurum se Anto-
nius dixit: mediusque inter illos repugnante nemi-
ne ad urbem processit: ac portæ appropinquans,
quæ Moraria dicitur, à plebe rex salutus, & in
urbem exceptus, & in curiam more regio dedu-
ctus est. In qua Emanuel Fonseca Pintus Senator
nonnullis nobilibus & magistratibus præsentibus
hæc verba fecit. Castellanos rex Portugalen-
ses cum exercitu in Portugaliā ingressus est: ne-
que voluit, neque vult de regni successione senten-
tiam vllam expectare. Quare causa minimè extat,
cur posthæc Gubernatores imperium gerant: & iu-
risurandi religionem, quo nos iurauimus Guberna-
torum decretis & sententijs obtemperaturos quoad
de regni successione dijudicatum fuerit, ego nullā
amplius esse iudico. Sed vt Castellanos regis vio-
lentia resistamus, nobis rege opus est, à quo defen-
damur.

damur, atque tegamur, ni velimus in manus hostium venire. Vos autem ipsi tanquam Portugalensium principes, quando rex Henricus absque legitimo successore decessit, & necessitas cogit, nunc absq; aliorum populorum conuentu regem creare potestis. Ad cuius orationem omnes vno ore responderunt, Post regis Henrici mortem sibi semper in animo fuisse regem creare Antoniũ, quod regis Emanuelis nepos sit, Ludouici filius, multis, magnisq; virtutibus ornatus, à Deo etiam ex plurimis, grauissimisq; periculis, quæ omnibus nota sunt, ereptus, & in hæc turbulentissima tempora reseruatus. His de causis se nunc ipsum Antonium creare Portugalensium regem: & creationem eiusdem regis à Scalabitanis factam approbare: atque ipsi profiteri, & polliceri operam suam & studium ad res omnes bellicas, atq; ciuiles. Tunc ab eo petierunt, vti more maiorũ iuraret se ab alijs regibus datas Portugalensibus ciuitatibus immunitates, & priuilegia seruaturum. Quod ab Antonio protinus factum est. Deinde vexillum regium expandentes, & è curiæ fenestris efferentes, Antonium ter alta voce Portugalensium regem acclamarunt, & acclamari ab omnibus iusserunt. Post è curia in summum templum illum adduxerunt; atq; illinc per multas vrbis plateas & vicos in arcem cum eadem acclamatione, ac multo tubarum tiliarum tympanorumq; sonitu deduxerunt. vbi vexillum regium collocatum est. & Fonseca arcis clauis Hieronymo Payuæ eius præfecto Antonij nomine deinceps retinendas

dastradidit. At Ioannes Telius vt Antonium in urbem ingressum, & regem creatum accepit, cum vno Didaco Lupio à Sequeira triremium præfecto (nam ceteri triremium nauiumque præfecti ad imperium Antonij sese applicuerant) prætoriam triremim conscendens Setubal adnauigauit. Sed illum Gubernatores & portu prohiberi, & oppido excludi mandarunt: postea tanquam priuatum ad dicendam causam in concilium admiserunt: & neglectiorem officij, & peruersitatem increpauerunt. Et Antonius ad omnes Portugaliæ ciuitates litteras scripsit, se communi omnium consensu Olyssipone regem esse creatum, sibi que posthac esse parendum: & ne quis deinceps Gubernatoribus pareret, aut alium, quam se, regem haberet, edicto sanxit, ijs, qui facerent contra, pœnam capitis adscribens. Magnis quoque pollicitationibus arcium præfectis suauit, vt ipsas vel in suam potestatem traderent, vel suo nomine retinerent. Ac quædam ciuitates in Antonij verba iurarunt, quædam à Gubernatorum authoritate discedere noluerunt, quædam sub regis Philippi imperium concesserunt, præsertim ea, quæ in extremis Portugaliæ finibus sunt. Præfecti autem arcium vel ipsarum defendendarum desperatione, vel præmiorum spe, vel cognatorum & necessariorum verbis commoti illas Antonio tradidere. quanquam Tristanus Vasaus aliquantum est cunctatus arcem Sancti Iuliani tradere: & Antonius Castrensis iam arcem Cascalis, cum primū Antonius à plebe rex creatus est, deseruerat. Ceterum

H

rūm

rũm Antonius ad alliciendos Gubernatorum animos, & cognoscendam oppidanorum voluntatem Comitem Viminosenſem Setubal miſit. Setubalẽſium ſumma in Antonium voluntas fuit: at Gubernatores nulla ratione adduci potuerunt, vt ad Antonium accederent. Itaque ex vicinis pagis coactas aliquot cohortes Antonius Setubal prẽmiſit, monens ſe mox eõdem iturum. Quare tres Gubernatores cum aliquot nobilibus clam naui perſugerunt ad oppidum Aiamontem, quod in Batica ad oſtiũ fluminis Anæ eſt. quos Dux Metimnæ Sidoniæ, qui illi oræ præerat, benigniſſimẽ excepit. Archiepiſcopus Olyſiponenſis & Ioannes Telius, alter ſua dignitate, alter Antonij in ſe ac ſuos voluntate, conſiſi remanſerunt. Dux Brigantinus, qui neque cum rege Philippo, neque cum Antonio conuenire vnquam voluit, neque gratia apud nobiles, neq; authoritate apud plebem valens plurimũ, timens aliquam ab Antonio indignitatem ad ſua ſe oppida recepit. Miniſtri regis Philippi diuerſis vijs alia alia Paxauguſtam abierunt. Antonius cognita Gubernatorum & aliorum fuga, conſeſtim flumen tranſmiſit, ac Setubal contendit: receptuſq; magna cum pompa à Setubalenſibus eſt. At, qui Aiamontem perſugerant, Gubernatores in Caſtromerinum oppidum, quod contra Aiamontem in Portugalia eſt, iuerunt: ibique regem Philippum renunciarũt verum, & legitimũ Portugaliæ hæredem; Antonium verò ſpurium, hoſtem patriæ, & perduellem. Id quod Aiamonte facere noluerunt, ne aut alieno loco,

loco, aut coactè id fecisse viderentur. Atque hanc suam renunciationem per Ferdinandum Norugnā nobilem Olyssiponensem regi Philippo significarunt. Dux Brigantinus vt Setubale excessit, ad regem Philippum suo & Catharinæ vxoris suæ nomine scripsit, quòd illi sua iura cederet, dum æqua præmia sponderet, quæ cum Antonio pacisci ab vniuersis Portugalensibus admonetur: rogauitque vt citò responderet, quòd maturè consultum rebus suis vellet. Cui rex Philippus respondit, se illi de discessu è Setubale gratulari, quòd indignitatem aliquam id loci tandem aliquando pertulisset. Iurium cessione verò sibi opus non esse. Sua iura ita per se firma & rata esse, vt nulla accessione indigeant. nihilominus se eius & Catharinæ rebus, vt propinquū decet, fauturum. Hoc temporis spacio Sebastianus Britus vrbs præfectus post Petrum Cugnam, qui relictæ eius custodia in villam secesserat, cum multis collectitijs copijs ad oppugnandam arcem Sancti Iuliani Olyssipone profectus est: quæ ex omnibus vicinis arcibus vna in potestatem Antonij nōdum tradita erat. Verūm Tristanus Vascus, cum reliquarum arcium præfecti se Antonio dedidissent, & idem ipse facere à cognatis & amicis rogaretur, atque insuper ab Antonio magnis præmijs sollicitaretur, quam Gubernatorum nomine hætenus renuerat, posthac Antonij nomine se retenturum arcem promisit. Itaque Britus dimissa obsidione in urbem reuertit. Antonius quoque compositis Setubalensium rebus, contra multorum consilium, qui

Setubali eum remanere voluissent, vt procul à regni sede bellum gereret, Olyfsiponem redijt; ac solēni apparatu exceptus; eiufq; aduentu dies festus tota vrbe cum saltationibus & cantibus actus est, muliere æthiopissa similiū sibi fœminarum ducente cohortem, atq; infurnibulū pro telo gestante, vt illius mulieris memoriā referret, quā Portugalenses memorant olim septē Castellanos infurnibulo prostrasse. Atque huiusmodi ludicra, & arrogantia plena facinora in Castellanorum contemptum permulta alia exhibuere, de se ipsis arrogantius gloriantes, nec modum tamen vllum, quo se ab illorum armis defenderent, inquirentes. Rex Philippus cognoscens quæ ab Antonio, quæque à multitudine in Portugalia fierent, quamuis statuisset bello interesse, tamen pro tempore mutato consilio, Toletano imperauit, vt si videret aduersarios non ex iure agere, sed velle vi regnum occupare, conseruandi ac defendendi iuris sui causa exercitum in Portugaliā inferret: atq; eos, qui se dederent, benignè reciperet, qui contra starent, armis subigeret. monuitque ne hostile quicquam faceret: vt nullus animus in nocendo infestus appareret, tantū in castigando seueritas adesset. Ac præcepit ne pateretur à quoquam segetes & frumenta, quæ maturuerant, corrumpi: quòd ipsi maiori vsui, quàm hostibus futura essent. Præterea edictum in Antonium & eius fautores, quale in perduelles proscribi solet, edixit. Toletanus è Cantillana Portugaliā versūs castra mouit: ac rex cum regina & liberis ad visendum

dum exercitum iter facientem M. circiter pass. Pax-
 augusta egressus est. Duæ hinc viæ Olyssiponem
 Toletano monstrabantur, ad quam occupandam
 omnes cogitationes & vires intendebat, quippè re-
 gni caput, quacum vniuersam Portugaliam cape-
 ret, altera per Scalabim, altera per Setubal. In illa
 hæc commoda: quòd capto Scalabi hostis à multo
 com meatu illicò intercluderetur, ac reliquum iter
 facile & expeditum foret. Sed à Toletano hæ dif-
 ficultates considerabantur, quòd nec pons in Tago
 facile fieri, aut factus defendi; nec oppidum Scala-
 bis natura munitum, si quibusdam obuallaretur
 operibus, paruo negotio expugnari posset. timeba-
 tur præterea ne aduersariorum multitudo, quæ ex
 vicinis agris coiret, iter è Castella com meatum ad
 se ferentibus interfepiret. At in altera via multa in-
 commoda cernebantur: primùm oppidi Setubalis
 expugnatio; deinde arcis, quæ III. m. pass. distat ab
 oppido; tum in Cistaganam transitus, & in terram
 arduus è nauibus ad Cascale descensus; ac triū post
 arcium Cascalis Sancti Iuliani & Bethlem oppu-
 gnationes, quæ multum temporis laborisque requi-
 rerent. Toletanus tandem hac via primùm eundū
 censuit, vt classi, quæ milites tormenta & cibaria
 multa comportabat, portum pararet. adhuc maris
 possessionē acquireret: vnde aduersarijs com mea-
 tum & auxilia intercluderet. insuper iunctis mari-
 timis & terrestribus copijs bellū terra marique vali-
 dior gereret. Et quoniam timendum erat, ne aut
 classis aduersa tempestate Sacrum promontorium
 supe-

Sacrum
 Promēt.
 vulgò
 Cabo de
 San Vito
 te.

*Præses
vulgo
Adelan-
tado.*

superare non posset, ac Setubal in tempore aduenire, aut magna hostium manus in via occurrens iter suum remoraretur, cibaria in XL. dies portari voluit (cuius rei causa magnam vim carrorum comparauerat) & hostem, quicumque adesset, ad pugnam elicere proposuit, atque omnia, per quæ vaderet, loca præsidij firmare, vt tutò semper è Castella sibi commeatus adueheretur. Itaque II. m. peditum Petri Ayalæ cum C. equitibus sub imperio Martini Padillæ Castellæ Præsidis circum fines, qui Portugaliæ à Castella dirimunt, relictis, vti Eluios, & Oliuentinos, vicinofque illis populos in officio continerent, atque omnem impetum hostilem, si quem in exercitus terga fieri contingeret, propulsarent, iter Extremutium direxit. Oppidani conspectu exercitus territi sese dedere voluerunt: sed eos Toletanus sinè arce recipere noluit. Arcem Aceuedus, cuius suprà memini, tenebat, regi Philippo aduersus. Is primò pertinaciter restitit: deinde oppidanorum precibus fatigatus, ac præsidiorum militum virtuti & voluntatibus diffusus, nec non Toletani comminationibus permotus se, & arcem dedit. verùm ob peruicaciam in arcem Villæuitiosæ captiuus missus est. quanquam nonnulli censebāt grauius de homine supplicium sumi oportere, vt eius pœna deinceps aliorum obstinationē deuinceret. Recepto Extremutio Toletanus ad oppidum perrexit, quod Montem maiorem nominant: vbi Didacus Menesius cum Comite Viminofensi ciues ad pugnandum hortabatur. sed illi
vastita-

vastitatem agri, & direptionem oppidi metuentes de deditione cogitabant. quam, vt exercitus propius admotus est, fecerunt. Didacus Menesius relicta Transtagana cum Comite Viminosenfi Olyfiponem ad Antonium abiit. Eodemque tempore Ciuitas Eborensis in Trāstagana nobilis, ac pleræq; alia in Portugaliae confinijs in regis Philippi ditionē venerunt. Ex Monte maiore Toletanus Setubal perrexit. Quo explorato itinere Antonius milites, quos Scalabim antea miserat ratus hostem illac iter facturum, reuocauit, ac Setubal misit; duas etiam maiores & rostratas naues ad bellum aptas, quas Galeones vocant, vt vnā cum arce portus ostium ab hostili classe tuerentur. At Toletanus Ferdinandū filium cum aliquot peditum equitumq; cohortibus ad explorandum Setubalis situm præmisit. qui vt ad urbem accessit, inprimis fluentem in illam aquā dulcem auerit. altero post die cum exercitu eodē ipse peruenit. positisque castris per præconem ante Setubalis mœnia pronunciari iussit, Se non ad inferendum bellum, sed ad capiendam eius oppidi possessionem pro rege Philippo venire, ad quem hæreditas Portugaliæ iure obtigerat. ne resistent, & contra ius eant, monere. Setubalenses primò restitere: ac portis egressi cum suorum nece vim hostiū breui certamine experti sunt: deinde vbi locata contra urbis mœnia quatuor ænea tormenta viderunt, magis suis bonis, quàm Antonij beneuolentiæ cōsules, ad Toletanum legatos de deditione mittere, si vnā cum suis bonis conseruarentur. sed cum
pactione

pactione Toletanus eos recipere noluit: & vt regis Philippi potestati ac voluntati sese committerent suaserit. Vnde qui vrbis præsidio impositi erant milites Galli & Angli, ad liberam deditionem inclinantem ciuium voluntatem cernentes, ne quam contumeliam à Castellanis paterentur, per vrbis muros sese demiserunt, ac nauibus, quæ ad litus religatæ erant, nocte socia diffugerunt. Setubalenses orta luce sine vlla pactione sese dedidere. quos Toletanus humaniter accepit, & conseruauit: cavitq; militibus ne cuiquam Setubalensi iniuriam facerent. quorum insolentiam & auaritiam cum primò verbis cohibere non potuisset, aliquorum supplicio deinde repressit. De Setubalis deditione nuncius incertus & obscurus Olyssiponem allatus vniuersam ciuitatem motu vario perturbauit. ac tres mulierculæ ad Antonium accedentes auxiliũ pro suis maritis orarunt: quos desertos à reliquis solos mœnia Setubalis ab vniuerso Castellanorum exercitu defendere aiebant. Antonius ad Comitem Viminiensem os conuertens, ipsum rogauit vellet ne illarum mulierum maritis opem ferre: eiq; annuenti iussit vt manum hominum pararet. Ad quæ verba conclamatum ad arma est. Concurrunt ad litus iuuenes ac senes, armati inermesque. naues vndique conquiruntur: aliæ in mare deducuntur, aliæ ad litus attrahuntur. complentur subito omnes. Antonius cymba vectus cunctas circumit, gestitq; aspiciens multitudinem: nec tamẽ quid fieri debeat, aut velit imperat. Interea nauis quædam ex alto
portum

portum subire conspicitur : arrectisq; animis nuncium de Setubale certum expectant . Intelligunt pro certo Setubal Castellanis deditum . quo nuncio alijs ferendi auxilij studium relaxatur , alijs occultus metus dissoluitur . atque hora diei nona in terrā ē nauibus descendunt Solis ardore & inedia fessi . Ac nocte media rumor quidam pertulit Castellanos Olyssiponem aduentare : mox fama à nocturno timore maior effecta auxit omnia vana . diuulgauit eos adesse , tum vrbis portas ingressos cuncta diripere , atque corrumpere . Fit tota vrbe strepitus atque tumultus . Domus , vici , plateæ clamoribus & vlulatibus implentur . quid quisq; agat ignorat , contigentibus omnia tenebris , nec quid speret , aut timeat habet . Sed lux adueniens rei vanitatem aperuit ; & cum tenebris metus euauit . Post hæc Simon Miranda dux eorum militum , quos Setubale diffugisse diximus , Olyssiponem venit ; atq; omnia , quæ acciderant , ordine enarrauit : sed eum prodicionis accusatum Antonius in vincula coniecit . Tolletanus postquàm oppido Setubale potitus est , arcē , cui nomen est ab Othone , III. m. pass. procul ab oppido ad ostium portus capere constituit : atq; huic negotio Prosperum Columnā præfecit . Arx Othonis ad radicem montis posita à sinistra sinus , quem (vt suprà dixi) influens Oceanus facit , latum III. m. longum XXX. m. pass. ipsa VI. pass. ab ostio , naues ab introitu arcet . Sed priusquàm tormenta locarentur , eius præfectus amicè commonitus est , vt ipsam vero Portugalensium regi traderet . At cū ad tradendam

I

dendam arcem nulla oratione induceretur, vi cogē-
 dus fuit. Verū in locandis tormentis duæ difficul-
 tates erant, altera ab asperitate loci. nam saxa per-
 rumpi, & solum inæquari oportebat. altera ab ho-
 stibus, qui ex arce & duabus rostratis nauibus, quas
 ab Antonio missas suprà monstrauiŒmus, vi ignis
 emiŒsis ex aneis tormentis ferreis globis opus di-
 sturbabant. Sed labore & industria cum aliquorū
 iactura vtraq; difficultas superata est. Inæquato so-
 lo, duobusq; tormentis locatis, alteram nauim, à
 qua plus incommodi accipiebatur, acriter feriunt.
 nauitæ nauim, ne laceretur, sublatiŒ anchoris ac-
 pafsiŒ veliŒ in interiorem partem sinuŒ agunt. Præ-
 fectus arcis proditiŒnem factam credens nauim
 ignitiŒ ferreis globiŒ icit. quorū ictu malus cum an-
 tēna perfractus aliquot sua ruina oppressit, aliquot
 vulnerauit. Post tertium oppugnationiŒ diem Al-
 uarus Bazanus cum classe LX. triremium; quarum
 VIII. Siculæ, quibus post correptum morbo Fabri-
 tium Columnam AlfonsoŒ Leyua; XXII. Neapoli-
 tanæ, quibus Ioannes Cardona; reliquæ Hispanæ,
 quibus idem Aluarus peculiariter præerat; Gadi-
 bus profectus quo tempore Toletanus iusserat, atq;
 oram Algarbiorum præteruectus, oppidiŒ, quæ in
 ea sunt, in regiŒ Philippi ditiŒnem receptiŒ, adueni-
 re conspectus est. Itaque præfectus arcis terra
 mariq; obsessum se videns, deditiŒniŒ conditionē
 à Prospero Columna petijt, vt inuiolatus cum suis
 abiret: atque impetrauit, inscienŒe Toletano, qui,
 ni ProŒperi Columnæ sponŒio interceŒŒisset, illius
 auda-

audaciam punitam voluisset. Post arcem Othonis cum nauibus traditam *Palmella* proximum *Setubali* oppidum etiam *Toletano* traditum est. Ipse omnia, quæ capit, loca præsijs munit. Ac paulò post *Alfonsus Bazanus Aluari* frater post fratrem *Gadibus* profectus cum XXX. onerariarum nauium classe, quæ multum commeatum ac bellicum apparatus portabant, *Setubalis* portum tenuit. At uerò *Gregorius XIII. Pont. max.* secum agitans nec *Portugaleses* ob magnum in *Castellanos* odium sponte sub regis *Philippi* ditionem ituros, nec regem *Philippum* ius, quod in *Portugalia* habet, neglecturum, metuensque ne ex hac dissensione bellum oriretur, quod rempub. Christianam affligeret, *Alexandrum Riarium S. R. E. Cardinalem* in *Hispaniam* legauerat, ut regem *Philippum* & *Portugaleses* ab armorum contentione retraheret. *Riarius* pridie *Kalen. Maij* *Roma* profectus, terrestri itinere primum *Barcinonem* attigit. quò rex *Philippus* gratulatum illi in *Hispaniam* aduentum, & amici officia præstitum *Lupium Auellanedam* misit. Ille deinde & legationis suæ munere commonitus, & multorum nobilium *Portugalesium* litteris ad componendam pacem sollicitatus, ad regem *Philippum* *Paxaugustam* aduenit. quem a graualetudine affectum primis aduētus sui diebus adire non potuit: post meliusculè se habentem conuenit, atq; ita alloquutus est. Plurimam salutem rex *Philippe* tibi dicit, & apostolicam benedictionem *Gregorius XIII. Pont. max.* & cui optimè cupit, à

I 2 Deo

Deo quietam Portugaliæ possessionem exoptat. Ac certè magnam animo lætitiā cepit, cū intellexit regem Henricum statuisse te Portugaliæ regem denunciare: ac quando id à rege Henrico factum non est, quòd morte præuentus sit, sperat ipsos Portugalenses victos ab æquitate facturos. Sed cū sæpe te per Nunciū suū admonuisset vt arma deponeres, ac iurisperitorum iudicio, quorum fides nulli suspecta esset, causam committeres; nec arma deposita, sed auctas copias ex multorum literis ac nuncijs acciperet, timeretq; ne relicto iuris certamine vim adhiberes, vnde Portugalensium odium magis accenderes, ex quo resp. Christiana turbaretur, & ipsa Portugalia prauis religionis erroribus inficeretur ab exteris nationibus, quarum auxilia accerserent, tum maiorum suorum exemplo, tum singulari in te beneuolentia motus me legatum ad te misit, qui suo te nomine commonefacerem, vt armis abstineres, nec solū tuorum iurisperitorum, sed aliorum etiam iudicio stares. quandoquidem regis amplitudo non in multorum regnorum possessione, quæ vi sua mutabilia sunt, atque ad diuersos transferuntur, sed in iustitia posita est firmissimo imperij fundamento. Non tamen ob id inquit vt arma abijcias, quæ contra iniurias iustè sumuntur, sed ipso iure nitaris: in quo nemo te omnium interpellare poterit. Atque ipsemet Pontifex omnem suam operam & auxilium contra eos pollicetur, qui tibi obstare voluerint. Sic & tu rectè regnare, & Portugalenses tibi iure obtemperare videbuntur.

debuntur. Cui rex Philippus ita respondit. Pontificis maximi voluntatem omnibus in rebus erga me semper optimā perspexi. Quarè de paterno eius in me animo semper illi ingētes ago, & habeo gratias. Atq; equidem velim intelligat me primū iurisperitissimos omnes cuiusvis gentis etiam Portugalēses de meo in Portugaliā iure consuluisse, omnesq; respondisse sine vlla controuersia optimum esse. Quod deinde rex Hentricus consultum & exploratum habens, me per Antonium Pineirū Episcopum Leriensem in concilio Almerini conuocato regem Portugalie declarauit. Ex quo permulti Portugalenses regnum mihi deferre voluerunt: sed aliquorum potentiorum verbis & minis deteriti sunt. Cū ergo ego viderem ex æquo & bono me ius meum obtinere non posse, rerum sacrarum peritos consului an mihi liceret ipsum armis persequi. & quamuis respondissent licere, tamen nullā vim facere volui, sed bonis verbis & promissionibus nunc æquitatem meæ causæ docendo, nunc immunitates & priuilegia pollicendo conciliare aduersariorum animos studui. Verū vbi Antonius sine dubio spurius sollicitare contra me plebem, & regnum capere vidi, ac magistratus alijs auferre, alijs mandare, exercitum in Portugaliā immisitum ad capiendam regni debitam mihi possessionem, tum ad defendendos ab improborum iniurijs & maleficijs bonos subditos, qui parere iusto imperio volunt. Quamobrem arbitror me à Pontifice maximo reprehendi nullo modo posse, quòd
arma

arma contra ius ceperim, aut vim iniustam attulerim. Meam vitam omnibus notam esse, notos mores, notam mentem & animum: qui semper de meis bonis aliquid deperdere malui, quàm alicui quicquam auferre. Quinimmo mihi persuadeo, cum me Portugalia potitum, & vtramq; Hispaniã sub vnius imperio coniunctam viderit, non paruum ex hoc Pontificem maximum lætitiã capturum & propter eius in me singularem beneuolentiam, & propter religionis Christianæ maius firmamentum ac robur. Hoc responso accepto Riarius, cū Antonius regis nomen & regni aliquam pessione à multitudine accepisset, ac regis Philippi exercitus in Portugaliã ingressus magnam regni partem occupasset, nec decorum illi regium nomen & insignia deponere, neq; huic vtile victorem exercitum retrahere, incertus fuit quid ageret. ac quando rerum Portugalensium status ex eo tempore, quo legatus fuerat, immutatus erat, pro nouis mādatis ad Pontificem maximum scripsit. Iam Olyssiponenses rebus suis diffidere, audiētes Setubal, in quo satis roboris ad refringendos aduersariorū conatus esse rebantur, breui tempore cum arce captū, ac videntes ad resistendū regi Philippo sibi omnia imbecilla, neque animi, nec consilij satis in suis ducibus esse, fidei etiam parum, etsi iactantiæ plurimum: auxiliorum prætereā spem omnem extinguī. quanquam ab Antonio bono animo esse iuebantur. Ipse quoque Antonius videns omnia oppida, ad quæ regis Philippi exercitus accederet, in illius pote-

PORTUGALIA.

67
76

potestatem illico tradi, ciuitates, quæ ante sibi fidẽ dederant, nunc dubias esse, nobilem quemque ad aduersarios transfugere, apud se plebeios & inertes tantum remanere, atq; eos, quos vel desperatio veniæ, vel arcta necessitudo, vel metus amittendorum bonorum retinebat, quasi desertus ab omnibus timere grauius cœpit: atque hoc etiam magis, quod magis externa auxilia desperabat. Nam Franciscus Barretus Olyssiponensis & Petrus Dorus Gallus, quos à Gubernatoribus in Galliã missos supra memorauimus, nullas copias comparauerant. siquidem Olyssiponensis nullam pecuniam acceperat, quam militibus, quos cogeret, daret: Gallus quam paucam acceperat, in suos usus conuerterat. Nec Galliæ principes venire portugalsibus auxilio velle aiebant, nisi duas arces sibi tradidissent Cascalis & Sancti Iuliani: in quibus receptum haberent, cum aduersi aliquid contingeret. Quam conditionem à Gubernatoribus recusatam, ne rerum Portugalsium aliquando Galli hac via potirentur, Antonius ad Barretum scripserat, ut acciperet: sed nec in tempore scribi milites, nec commodè mitti poterant, omni ad eum aditu ab aduersariis intersepto. Cum igitur externæ opis expectatio nulla amplius, aut quam minima relinqueretur, quotquot poterat colonos pastores operarios vndique ad bellum cogebat: & ex ipsis religiosis familijs, quos ad bellandum idoneos reperiēbat, armabat: iubebat etiam clericos depositis togis saga sumere. Præterea feruos, quicunque militare voluissent, libertate donabat: illisque

illisque facultatem concedebat à dominis arma & equos abripiendi. quorum IV. cohortes armatae sunt. Sanciuerat quoque edicto vt omnes in urbem conuenirent: sed eorum, qui venire neglexissent, bona proscribebantur; ab his verò, qui venissent, pecuniae in militum stipendia petulanter exigebantur. Mercatores iniquè vexabantur: peregrini asperè tractabantur, à quibus iuuari manu & consilio poterant. Cuiusvis delicti & sceleris poena pecunijs redimebatur; omnisque via conficiendae pecuniae quaerebatur. Dabantur obscuris & ignobilibus hominibus militiae Christi insignia, magistratusque indignis, & nouis Christianis mandabantur. Dominabantur in vrbe plebei, rapaces, & insolentes cum summa vitae licentia & impunitate: ita vt in nouo regno vicem suam permulti dolerent, de regis ministris omnes viri boni magis, quàm de aduersarijs timerent. Quotidie conuocabant concilium, & nihil in eo decernebant: atque inter ipsos consultores inuidia dissensiones procreabat. Comes Viminensis dux exercitus esse volebat, cui Didacus Meneſius praefectus erat: & gratia, qua Odoardus à Castro diuitis mercatoris filius apud Antonium plurimum poterat, multorum animos alienauerat. dumtaxat noui Christiani à Iudaeis oriundi, quorum maximus est in Portugalia numerus, & aethiopes, quos permultos Olyſipone cernas, gens seruilis & humilis, Antonium lubenti animo sequebantur. Rex Philippus verò vt aequitatem & bonitatem suam ostenderet, edicto veniam dedit, & impunitatem

ijs,

ijs, qui aut vi coacti, aut errore decepti, aut cōmu-
 ni quodam odio contra Castellanos affecti contra
 se arma cepissent, rebellionis authores & adiuto-
 res excipiens. Quo multorum animi spe veniæ re-
 languescere cœperunt: & Antonius multis parū
 fidere; suspectosque sibi in custodia asseruare. in
 quibus Georgius Menesius maiorum nauium præ-
 fectus ob interceptas (vt ferebatur) ad regis Philip-
 pi ministros litteras. Toletanus interea circumspi-
 ciebat quam viam iniret, quæ Olyssiponem faci-
 lior & expeditior esset. Nam tres commostraban-
 tur, vna per Scalabim, altera per Tagi fauces, ter-
 tia per Cascale: quod oppidum XV. m. pass. infra
 Olyssiponem est in altera ostij parte, in quod Ocea-
 nus penetrans flumini Tago coniungitur. Viam per
 Scalabim longam, æstuosam, & puluerulentam
 esse intelligebat, & illac difficilem fluminis transitū;
 quod nec pontem habeat, quo pedibus transiri pos-
 sit; & cymbæ, quas Hispali fabricandas ob hant
 rem curauerat, aduectæ non essent; atq; adessent
 eadem difficultates, quas suprà indicauimus. In
 portus verò claustra per angustas fluminis fauces cū
 classe irruptionem sinè maximo damno & pericu-
 lo fieri non posse videbat; quod sitæ à dextra & si-
 nistra arces Sācti Iuliani & Cauezzæ siccæ tormen-
 torum ictibus introeuntes triremes aut lacerarent,
 aut vadis alliderent; ac maiores naues hostium in
 ipsis faucibus positæ mole sua introitum obstruerēt.
 At per tertiam viam breuissimum æstate media tra-
 iectum cernebat; & arces, quæ inter Cascale &

*Hispalis
 hodie
 Senilla.*

K

Olyf-

Olyſſiponem ſunt, non magno negotio capi poſſe iudicabat; tantummodò excenſionem in terram timebat ob altas & præruptas rupes, quibus totus ille tractus litoralis continetur. Doctus tamen à locorum peritis ſupra Caſcale M. & D. paſſ. ſeptentriones verſus humilem quendam inter rupes locū, quem incolæ Marmam veterem nominant, aquis pluuijs, quæ in Oceanum deſluunt, exeuſum, ad quem binæ, aut ternæ cymbæ appellari poſſent, relictum eſſe ab aduerſarijs incuria, quòd nulla hominum memoria ne piſcatoria quidem nauicula eò vquam appuſa fuiſſet, hanc tertiam viam probauit: ac terra marique cuſtodias diſpoſuit, ne quis ad hoſtes transfugiens hoc ſuum conſilium enunciarer. Tum ſimulans velle calabim proficiſci, Germanos cum tormentis ea via præire iuſſit: moxque reuocauit: atq; in triremes quotquot potuit milites cum CC. equitibus & aliquot tormentis muralibus impoſuit; ac Caſcale ad nauigauit, excenſionem in terram periclitaturus. egreſſuſq; Setubalis ſinum Siſyram recepit, oppidum ad proximum litus ſitum: atque altero die ſub ortum Solis Caſcale appropinquauit, & ad Marmam veterem proras direxit. Didacus Menefius, qui Caſcale & maritimā illam oram cuſtodiebat, cernens hoſtilem claſſem aduerſum ſe agi, cum VI. m. hominum ad Marmā veterem procurrat, deſcenſum in terram hoſtibus turbaturus. Sed accedentem cum hoſtes tormentis è triremibus terrent. ſummotiſque magis inani terrore, quàm vlllo detrimento aduerſarijs, ſcap hæ
milibus

militibus complentur : atque accedente æstu , & sereno cœlo ad litus appelluntur . E quibus in terram primus omnium Rodericus Zapata cum XX. sclopettarijs exiit , tum Sancius Auila cum L. militibus , & deinceps alij post alios : contentoque gressu decliuis ripæ summum repugnante nemine obtinuerunt . post auctis cæterorum concursu viribus hostem penitus fugarunt . Fugatis hostibus , reliqui milites exponuntur : compositoque agmine Cascale propius incedunt : inclinanteque ad occasum die , ad ædem sacram B. Mariæ , cui cognomen à via est , consistunt . Rodericus Valdesius tamen cum sua sclopettariorum cohorte longius progredi iussus ad depellendos hostes è tumulo , quem occupauerant inter ædem B. Mariæ & Cascale , magna eos vi atque impressione deuicit . quo in certamine de Castellanis quatuor tantum vulnerati sunt ; de Portugalesibus desiderati plures : reliqui procul ab oppido & arce , quò vel hostium metus impulit , vel locorum opportunitas ire suavit , fusi fugatique abierunt . Menesius cum XX. militibus in arcem se recepit , quæ iuxta litus ab oppido sagittæ iactu abest . Huius rei nuncijs ingenti metu Olyssiponenses perculsi sunt : atque Antonio ad arma vocante magna hominum multitudo conuenit : sed eum hortantem omnes ut se Cascale contra Castellanos insequerentur , pauci , iidemque tumultuose , partim etiam inermes subsequuti sunt : quamvis diuersarum religiosarum familiarum plerique viri vel tranquillitatis odio , vel amore licentiæ , vel dementia & furore correpti ,

dextris gladios, ſiniſtris cruces geſtantes, vt hor-
 tatorum, & adiutorum officia præſtarent, vniuer-
 ſos & ſingulos ad pugnam contra Caſtellanos ma-
 gnis vocibus & clamoribus adhortarentur. Vbi vē-
 tum Bethlem eſt, minorem opinione ſua manum
 arma ferentium conſpiciens (neque enim plures,
 quàm M. pedites & D. equites erant) primores con-
 ſuluit an progrediendum, an redeundum cenſe-
 rent. In quibus etſi fortè quidam cæteris pruden-
 tiores magis temeritate quadam agi, quàm vllò
 conſilio duci ſe viderent, tamen audaciſſimorum
 vociferatio contendentium nulla ratione redeundū,
 atque inſolentiùs inſtantium ipſorum ſingulis ani-
 mum eſſe cum vniuerſis Caſtellanis congregi, nul-
 lum conſilium dici ſinebat. verùm interueniente
 nocte cùm cibum capere voluiſſent, nec quicquā,
 quo reficerentur, inueniſſent, hoc vno incommo-
 do refracta illorum temeritas eſt. Toletanus poſt
 expoſitas copias, & tormēta, quæ ſecum aduexerat,
 Bazano præcepit, vt triremes ad conuehendū reli-
 quum exercitum & bellicum apparatus Setubal
 remitteret: atque Alfonſum Leyuam oræ mariti-
 mæ cuſtodix præpoſuit: nec non interim præfectū
 arcis admonuit (ignarus quòd eſſet in ea Menefius)
 vt arcem traderet, nec ſe temere perderet. Quod
 cùm ille facere noluiſſet, arx tormentis verberari
 cœpta eſt. Ad quorum iſtus præfectus de deditio-
 ne agere cœpit, cuius ſpecie aliquot Toletani mili-
 tes in arcem introiuerunt, & vt ſine pactione ſeſe
 traderet ſuaſerunt: neq; hoc facere illo volente, ipſi
 per

per vim arce potiti sunt: & imperatoris sui iussu vexillum candidum pacis insigne, quod Portugalenses post verberatam arcem extulerant, deposuerunt, & rubrum belli signum, quod ante oppugnationem illi erexerant, extulerunt, ut intelligeretur arcem non deditioe acceptam, sed vi captam esse. Menesius sese occultauerat: repertus autem per nuncium à Toletano petijt, uti atque infimus miles tractaretur; atque etiam facultatem postulauit ad Antoniũ, quem Portugaliæ regem nominauit, abeundi. Sed illi tunc à Toletano nullum responsum datum est (aderat autem nox) veniente verò die Tolerani iussu indicta mors est. Ita qui pugnare timuit, & se dedere noluit, capite luit temeritatem, an stoliditatem dicam nescio. Arcis præfectus etiam cum duobus alijs suspensus est: reliqui ad triremes damnati. Contigit autem nobilem quendam Olyfsiponensem cum XX. militibus ab Antonio subsidio Menesio missum concubia nocte cymbam ad arcis latus appellere, ignarum quòd ab hostibus teneretur, ac compellare militem in arcis vigilia stantem, rogareque ut sibi portam aperiret. cui miles Portugalensis consultò ad colloquendum suppositus, ne aliena lingua suspicionem daret captæ arcis, respondit se portam aperiturum. in quam ille ingressus sensit in hostiũ manus incidisse. Tunc pagus Synta VI. m. pass. Cascali, XII. m. pass. Olyfsipone distans ad radicem montis Lunæ Toletano traditus est. Qui locus arboribus amœnus, fontibus iucundus, regijs ædificijs clarus est, atque æstiuo tempore

Portu-

Portugalsium regum delitiæ. Senatus Olyssiponenſis videns rem in maximum discrimen adductâ, ne vrbs opulentissima fieret hostibus præda, cuius auditas multò audentiores milites facit, Antonium orauit, vt cum ijs copijs, quas contraxerat, Castellanis obuiam iret. Antonius à Senatu pecuniam in militum stipendia primò petijt; quam nullam obtinuit, afferente Senatu ciuitatem sumptibus exhaustam esse: deinde ad componendum exercitum bi-
duum postulauit. quo tempore milites omnes ad Bethlem conduxit partim spontè, partim vi ad X. M. Verùm cum artis militaris scientes homines Portugalsenses non haberet, nec audirentur alienigenæ rerum bellicarum periti, ne superiores vlla re Portugalsensibus viderentur, & ipse imperator parum inter arma exercitatus esset, quid ageret ignorabat. Quidam aiebant iuxta arcem Sancti Iuliani castra poni oportere, in cuius defensione ciuitatis salus, & totius belli summa consisteret, vt arx munimento exercitui, exercitus præsidio arci esset: quidam longius ab vrbe discedendum propter multarum rerum opportunitates negabant. Quod consiliū probatum est. Itaque castris locum inter Bethlem & urbem eligunt, & munitiones instituunt. Toletanus post aduectum è Setubale cum reliquis copijs omnem bellicum apparatus ad oppugnandam arcem S. Iuliani Cascali profectus, ad pagum nomine Oëram è regione arcis castrametatus est. Ac primo die Franciscus Alaua contra arcem X. tormenta locauit, dein altera X. tum his omnibus XII. adiecit,

adiecit, equitibus, quos Antonius ad disturbanda opera miserat, retro à Sancio Auila paruo prælio cōpulsis. Atque inprimis tres maiores & rostratas naues, è quibus hostes nonnulla damna iniiciebant, tormentorum ictibus ab arcis præsidio summouit: ac mox arcem magno impetu verberauit. Porro Tristanus Vafæus arcis præfectus, quòd se diu sustinere non posse videret, æquam aliquam deditio- nis conditionem magna voluntate subiisset: verùm in iplo oppugnationis initio ex se conditionem vllā postulare non satis honestum putabat. Accidit au- tem, cùm scalæ & funes ab hostibus pararentur ad inuadendam manu arcem qua parte multis tormē- torum ictibus mure ~~dauidæ~~ erat, vt puella quæ- dam cum matre visendi mariti causa, & à Toletano & à Vafæo facta potestate, ex Oëra in arcem intra- ret, ac Vafæo suaderet vt se Toletano dederet, quòd ille maximum & fortissimum exercitum haberet, ipse rerum omnium penuria laboraret. Exinde Va- fæus in colloquium Toletani venit: atq; illū initio rogauit, cur more militiæ neminem ad se ante op- pugnationem miserit sciscitatum rationem, qua ar- cem teneret, atq; defenderet. Quod factum à se Toletanus asseruit; & per præconem sibi relatum fuisse, præfectū nolle arcem tradere. Ob hoc quæ- situs est ad suspendium præco: qui correptus ingēti metu sese occultauit. Post Vafæus explicuit quo mo- do arcem à Gubernatoribus primò acceperit, de- inde multis rebus cogentibus Antonij nomine te- nuerit, sed eo semper consilio, vt ipsam ei traderet, quem

quem Gubernatores Portugaliæ regem denuncia-
uissent. Hic Toletanus regem Philippum à Guber-
natoribus regem Portugaliæ denunciatum decreto
in Castromerino factò ostendit. Tunc Vasaus re-
tulit se arcem in regis Philippi potestatem traditurũ,
si modò sui milites & necessarij salui & incolumes
seruarentur. Insuper litteras ab Antonio ad se scrip-
tas aperuit, vt cognoscerentur præmia, quæ sibi
Antonius promiserat, ne minora à rege Philippo
referret. Eam conditionem Toletanus approbavit,
& de regis Philippi liberalitate illi plura, quàm spe-
rare posset, pollicitus est. Sic arcem S. Iuliani Tri-
stanus Toletano tradidit, Quod Tristani facinus
nonnulli proditione notarunt, diuini rerum ad se
defendendum necessariarum inopia excusarunt,
quidam etiam iuris æquitate & nobilissimorum
exemplo laudarunt. Toletanus validum præfidiũ
in arce posuit, & Tristanum apud se in honore ha-
buit. Ac post receptam arcem maturè classem è
finu Cascalis intra Tagi claustra recepit. & quidem
in tempore. nam alioquin paucis diebus post acce-
ptam arcem immoderata tempestas ab Africo &
Austro commota ad Cascalis litus illam fœdissimè
lacerasset. Et Petrus Barbus Antonij voluntate au-
ferens tormenta, quæ potuit, munitionem in Ca-
uezza sicca deseruit: Ergo vrbs ceruici imminen-
tibus hostibus, ab Olyssiponensibus iam mala omnia
timeri, & direptio vrbs, & amissio classis, quam
ex India & piperis & zinziberi & cinamomi &
aliarum pretiosarũ mercium onustam expectabāt.
Proin-

Proinde Senatus Antonio deditionem suadere; cō-
trā Antonius & suorum militum multitudine, &
externorum auxiliorum spe Senatum ad pugnandū
cohortari. veritusque ne qua posthāc molitio cō-
tra se fieret, fluminis transitum & vrbis portas suis
præsidij tenuit, fretus præcipuè initiatorum homi-
num fide, quibus licentia militaris cordi erat. Cū
verò omni sublato commercio res ad victum ne-
cessariæ nullæ, ne ab ipsis quidem colonis vicino-
rum agrorum in Olysisiponem urbem maximam
ac plenam humilium hominum inferrentur, à se ip-
sa quodam modo obsessa ciuitas graui rerum om-
nium inopia premebatur. Est in vrbe media mons
prominens, & in eius summo castellum, in cuius cu-
stodia Belgæ positi erant. casu verò factum vt ignis
tectō inhaerens flammam excitaret. quam Anto-
nius cernens, prodicionis signum esse credidit. ex
quo elatus subita ira, non benè re perspecta, non so-
lū Belgas, sed etiam omnes peregrinos ex vrbe
expulit, veleos, quorum opera sibi multis in rebus
utilis erat. Ac quoque præfectum arcis Bethlem à
custodia amouit, quem à Toletano ad deditionem
solicitari suspicabatur. Nec Toletanus castra ex
Oëra mouerat, sed per notos vtriq; homines Anto-
nium multis iustis causis ad pacem adhortabatur,
qui primū incertus ob dignitatis suæ rationem,
& regis Philippi voluntatem extitit; sed amissæ ar-
ces, extincta spes externorum auxiliorum, militum
paucitas & inertia, multorum quoque inconstan-
tia tandem eius animum ad pacem inclinarunt. Igi-

L

tur

tur dies colloquio dicitur in medio flumine procul ab alijs, in quod cum paucis vterque conueniat. Toletanus totam noctem in regia triremi moratus est, vt in colloquium cum Antonio iret: sed ille nusquam comparuit, aut veniam à rege Philippo desperans, aut Toletano diffidens, aut ab Episcopo Igæditanensi reuocatus. Quod Toletanus grauitè tulit: atq; extemplò Sancium Auilam cū M. & D. equitibus ad perspiciendam Bethlem arcem misit. qui M. & D. peditibus ac CCC. equitibus aduersariorum occurrens, præliū iniuit; diremptoq; paucorum iactura vtrinq; certamine, ad castra reuersus est. Altero die maior militum numerus è castris ad Bethlem emittitur: quorum pars cum aduersarijs dimicant, qui ad turbanda opera venerant, pars tormenta contra arcem locant. Atq; inprimis tres maiores & rostratas naues, quæ iuxta sunt, remouet; tū arcem tormentis percutiunt. quorum ictibus arcis præfectus perterritus se, & arcem tradidit, quam antè bonis verbis monitus tradere recusauerat. Sed eius confidentiam Toletanus suspensio damnasset, ni Alfonsus Leyua intercessisset. Capta arce castra ad Bethlem fecit: & vt classi liberum & ex omni parte tutum iter Olisiponem vsque esset, turris veteris, quæ in altera parte fluminis contra Bethlem est, præfectum commonuit, vt ipsam dederet; formidinesq; opposuit. Ille Toletani dicto audiens fuit. Postea cum M. & CCC. equitibus ac M. peditibus ad contemplandum castra Antonij, quæ à suis M. & D. pass. totidemque Olyf-

Olyssipone aberant, profectus est. Locus, vbi Antonius castra fecerat, montuosus est, à Tagi litore conscensu non satis arduo subuectus: per quem à Septentrionibus oriens fluuius brevis, humilis, & imbri crescens inter excelsa & prærupta saxa in Tagum defluit. Ipsæ rupes ad caput fluuij iunguntur, & in litus Tagi satis lato, ac pari ferè interuallo disiunctæ procurrunt: ac quâ desinunt, fluuius ponte, quæ Alcantaram nomine arabico vocant, transmittitur. cui continens est pagus, qui à ponte nomen Alcantaræ vnâ cum fluuio accepit. Antonius in altera ripa castra fecerat, & munitionibus à dextra & sinistra obtexerat. nam media ripa præceps rupe prærupta nullum accessum dabat. Pontem quoq; medium tabulis & asseribus obstruxerat. Ad alterâ ripam igitur Toletanus inspectum loci naturam & aduersariorum castra venit, pulso ex itinere hoste, qui armatus occurrerat: contemplatusque loci naturam & castrorum situm, atque à speculatoribus accipiens Antonium ad XVI. m. hominû in castris habere, sed magnam eorum partem colonorum, pastorum, feruorum esse, nec arma, nec armorum vsum habentium, contra eius castra sua designauit, ac certa quibusq; loca dispertiuit. Ad Alcantaram pagum Italos, supra Italos Germanos, in summa & media rupe Hispanos, ad initium rupis equitatum locari; ac tribus locis tormenta disponi iussit, iuxta Germanos, iuxta equitatum, & in editiore tumulo prope Hispanos. Prætereà Bazano præcepit classem in ipso Tago contra aduersariorum maiores naues

L 2 atq;

atq; triremes instruere; ita vt classe & equitatu quasi duabus alis totus exercitus protegeretur. Equitatum Ferdinandus filius, Hispanos Sancius Auila, Germanos Hieronymus Lodron, Italos (nam Petrus Medices incommoda valetudine tenebatur) Prosper Columna regeret. Postquàm omnia descripsit, in castra reuersus est; ac militum præfectis imperauit, vt sub ortum lucis suum quisque locum caperet; & cùm pugnae signum daretur, Itali cum Germanis inferiores, Hispani cum equitatu superiores munitiones inuaderent, Franciscus Alaua tormentis aduersariorum ordines conturbaret, eodemq; tempore Bazanus hostilem classem adoriretur. Et quò infirmiores ad resistendum essent aduersarij, iussit Prospero Columnæ CCC. Italos ad pontem præmittere, qui leuibus iaculationibus totam noctem hostes insomnes haberent. Hortatus insuper est, vt viros se esse meminissent, atque hanc vnā pugnam alacri animo susciperent, quæ omnium laborum finem allatura esset. Postremò multis orauit atque obsecrauit, vt si Deo iuuante hostes vicerent, ac fugatos depulissent, milites ab vrbe ingressu continerent: quam rex Philippus inuiolatā, quā captā omnino mallet. ac summum supplicium in eos constituit, qui ad depredandam urbem intrassent. Deprecatusque est Deum immortalem, vt mori prius sibi contingeret, quā videre urbem à suo milite diripi. Post quæ Prosper Columna CCC. milites ad pontem misit. qui paruis certaminibus Portugaleses totam noctem insomnes tenuerunt:

mox

mox albente cœlo, magno impetu tabulationem, qua pons interclusus erat, perfringere conati sunt. Verum è moletrina, quæ in litore Tagi sita est, rectâ pontem prospectans, à Portugalensibus damnis afficiebantur. quod quidam animaduertentes, superato aggere, quo aqua continetur, vi moletrinâ cepere: atq; hinc in proximum hortum muris cinctum intrarunt, qui ad alteram pontis partem est. Sed è castrorum munimentis, quæ in consensu montis teli iactu à ponte aberant, magna aduersariorum manus irruens Italos è ponte disiecit: & contra eos, qui moletrinam & hortum occupauerant, acri Marte certabat. Intereâ Toletani exercitus aduenerat, & suum quisque locum ceperat, cum Prospero Columnæ nunciatur suos valida impressione à Portugalensibus è ponte disiectos; quosdam etiâ in summo periculo versari. **P**rosper ad pontem cum aliquot cohortibus accurrit; suis animum addit: quos orat, vt patriæ virtutis & gloriæ memores splendorem nominis Italici semper apud omnes gentes & nationes illustris nulla ignauia nota maculari patiantur. Itaq; acrior pugna redintegratur. Itali pontis tabulationem perfringunt, & aduersarios in castrorum munimenta propellunt. At Episcopus Igeditanienſis, audita ad pontem dimicatione, suæ personæ ac dignitatis oblitus per vicos & plateas vrbis ingenti & crebro tympanorum sonitu omnes ad arma vocat: alios minis, alios vi ad castra cogit: cuncta summo strepitu & clamore miscet. Nec **Antonius**, quia non induxerat in animum hostem
ad

ad castrorum opugnationem tam citò venturum; suos ad repugnandum instruxerat. Sed & suorum multi nocte metu diffugerant, multi in urbem domus cura abierant. Cùm verò Italos cum Germanis ad hostium munimenta conscendisse, & Sanciũ Auilam cum Hispanis ad superiores munitiones appropinquare Toletanus videret, signum pugnae sustulit. ad quod Franciscus Alaua ingentem vim ignitorum globorum tormentis in castra hostium emisit, & à componendis signis eos deterruit: Hispani Germani Itali in Portugalesium munimenta irrupere. Portugaleses summo metu undique perculsi non manibus, sed pedibus salutem suam tutantes, abiectis armis sese fugae alius aliò mandarunt. Illi istos cedere, fundere, fugare. Et fugientium alij in fuga feriri, alij cadere, alij vitam amittere, alij mortem inter cæsos expectare. multaque à victore in victos edi crudelitatis exempla, quæ furor fieri amat; vt ne suppliciter quidẽ petentibus anima interdum relictæ sit. Tellus infecta sanguine, ac viæ omnes telis, hastis, gladijs, sclopetisq; constrata, & strata inter arma exanguia corpora. A tertia hora inchoata pugna, & vsque ad septimã facta strages VIII. Kal. Septembris. Ad DCC. interfecti, vulnerati plures: & quicquid circum Olyssiponem ædium est (sunt autem multa magnis ædificijs & hortis insignia suburbia) id totum direptũ vastatumque est. Tantũ templis & religiosarũ familiarum domibus pepercerunt. Quin etiam vrbs ipsa direpta fuisset, ni Ferdinandus Toletani filius ad

ad portam accurrens, monendo, rogando, comminando, alios hostes à tergo esse confingendo milites ab irruptione prohibuisset. Post deuictas terrestres copias Bazanus, qui cum pugnae signum à Toletano datum est, classem ad pugnam aptare, & in hostem agere propter recedentem maritimum æstus non potuit, accedente æstu aduersariorum classem facile deuicit. Tunc Senatus Olyssiponensis ex vrbe Toletano obuiam prodiens, illi clauis urbis obtulit, ac regis Philippi potestati & voluntati sese commisit, persuasus à Toletano vt sine pactione sese dederet, cum de pactione agere cœpisset. Itaq; Toletanus urbem accepit, atque incolumem seruauit. Deinde relicto in ea Ferdinando filio cum aliquot nobilibus, qui ciuitatis motibus prospiceret, ipse cum vniuerso exercitu in castra Bethlem se recepit. Antonius, qui urbem ingressus quotquot in carcere asseruabantur nocentes homines ruptis vinculis custodia liberauerat, confestimque egressus in villa sese abdiderat IX.m. pass. ab vrbe, post curatum illic vulnus, quod ex incursum armorum in fuga ad collum acceperat, Scalabim concessit. Sed Scalabitani, qui primi eum regem creauerant, tunc apud se retinere victum noluerunt. Ita hominum fluxa fides est, & cum fortuna mutabilis. Nec defuere, qui vel incuriam, vel animū trahendi belli in Toletano reprehenderint; quod nec ante pugnam quicquam cōtra Antonium præceperit, cum pugnae ordinem institueret, neq; illum post victoriam conquiri curauerit: quando is vnus
totius

totius belli summam sustineret. Sed Toletani laudis fautores ipsum defendunt, quòd ante prælium non haberet, cui contra Antonium quicquam speciatim comitteret; eò quòd suorum nulli notus esset: post victos verò hostes magna diligentia tota vrbe illum quæsierit; nusquam tamen inuenerit. Postquàm verò comperit Scalabim profugisse, tunc neque paucos milites, qui ab aduersariorum, quæ coisset, multitudine opprimerentur; cùm præsertim ex nuncijs certior fieret quatuor naues Gallorù ad Vianam, quam aliqui Viennam Callæciam nominant, appulsas esse, quæ Antonio milites & arma portant: neque multos ad insequendum illū mittere conducibile existimauit, ne per quæ vaderent, loca deuastarent. Cæterùm Galli vbi intellexerunt Olyssiponem captam & Antonium victum atque fugatum, in suas oras remigrarunt. Et paucos post dies à deuicto Antonio classis ab India venit, quæ non mediocri lætitia totam ciuitatem affecit. Ad cuius præfectum Antonius post amissam maris possessionem scripserat, vt ipsam vel in Galliam, vel in Angliam ageret: sed eam Alfonsus Bazanus à Toletano cum XV. nauibus Setubale missus in itinere inuentam Olyssiponem secū adduxit. Post aliquot verò dies Toletanus intelligens Antonium Conimbricæ nouum exercitum cogere, Sancium Auilam cum CCC. equitibus & III. m. peditum, in quibus cum VI. bellicis tormentis III. Germanorum cohortes, ad opprimendum hominem misit. Qui aduentum Sancij resciscens,
cum

cum ijs copijs, quas contraxerat, Lauarem discessit, ac vi in oppidum introrupit, & ciues tributum ferre coëgit: atque insuper aliquos vinculis, aliquos supplicio affecit. Tum inde nauigare in Galliam statuit; sed amicorum suasionibus ab hoc proposito retractus, iter Portum contulit oppidū in Interamne nobile, situm in altera fluminis Durij ripa. quod à veteribus Cale vocatum est. Portuenses mœnia & ad urbē aditus, quibus Antonij aduentus erat, munerant: verū illi venienti partim metu, partim spontē patefiunt. Vnde ciues, qui rebus Antonij minūs fauerāt, portis effusi in diuersa loca sese proripuerūt. Quorum fuga audita confestim Antonius flumen transmisit, & in urbem apparatu regio acceptus introiuit: nec non magnum tributum ciuitati imposuit; & aliquorum domos diripuit. Dein iussit naues omnes atque nauiculas ad continentē ripam adduci, ne qua hostibus transeundi flumen potestas fieret. Prætereā Episcopum Igæditanensem Odoardum Lemum & alios beneuolos sui misit ad comparandos ex vicinis agris & oppidis milites. Insuper ad ciuitates de rege Philippo, qui agrotabat, scripsit, quòd morrem obierat: vt res bello necessarias libentiùs suppeditarent. Interim Sancius Conimbricæ appropinquans equitatum ad explorandos oppidanorum animos præmisit: qui reiecto Antoniano præsidio, vltro illum in urbē exceperunt. Hinc Lauarem perrexerunt: & ab oppidanis spontē receptus est. vbi paucos dies mansit, vt rei frumentariæ prospiceret. dein singulis cohortibus

M

tibus

tibus iussis VI. dierum frumentum secum compor-
tare, ad flumen Durium iter contulit: & ex itinere
misit cum aliquot militibus, & hominibus linguæ &
regionis scientibus impigros viros Thomam Vcedū
ad capiendas cymbas, quas hostis conduxerat ad
vicum inter flumina Durium & Tamegam XVIII.
m. pass. supra Portum, & Antonium Serranum ad
conquirendas alias nauiculas, quibus flumen traji-
ceret: peruenitque ad pagum, quem Villamnouā
nominant, Portui oppositum in aduersa fluminis
ripa. Ibi castra fecit, & vtrumque collem, qui à dex-
tra & sinistra assurgunt, occupauit. Sed duplex dif-
ficultas eum circumuenit, & rerum, quibus famem
depelleret, & cymbarum, quibus flumen transiret,
inopia. Illa ad pugnandam quamuis pugnam sti-
mulabat. siquidem militi optabilius videtur hosti-
libus armis cadere, quàm humanis necessitatibus
interire. hæc omnem pugnandi facultatem adime-
bat. Vt verò cognouit VI. à Serrano ad moletriam
IX. m. pass. à suis castris, & XVI. cymbas ab Vcedo
magno studio & industria ex hostium potestate cap-
tas, confestim ad Vcedum scripsit, vt secundo flu-
mine dilabens ad ripam, quam Petram Salgadam
nominant, M. & D. pass. à Villanoua eas appelleret,
& cum nauiculis Serrani coniungeret. Contra quæ
Antonius cum IV. nauibus multos milites misit, vt
ab hoste cymbas interciperent, aut labefactarent.
At illi post primos tormentorum ictus, cùm labor
malè celsisset, retro cursum flexere, nec aduersario-
rum incursum expectarunt. Sed neque transitus,
quoniam

quoniam Durius inter prærupta saxa fluit, ubiq; datur: & hostes aduersam Petræ Salgadæ ripam, qua Castellanos transitum attentaturos credebant, IV. bellicis tormentis, & IV. nauibus ad dimicandū instructis, quas contra Vcedum missas diximus, tuebantur. Doctus tamen D. pass. supra Petram Salgadam tutiorem transitum esse, illum tentare instituit: noctisq; silentio, quæ incceptum suum hostibus regeret, eò cū exercitu ex Villanoua transuerso itinere profectus est: ac partem copiarum ad Petram Salgadam misit. quibus iussit, vt aduersarijs speciem transeundi præberent. atque Vcedo imperauit VI. nauiculas illis relinquere, reliquas aduerso flumine, quò ipse tenderet, agere. Vcedum hostes sclopettarum ictibus & è nauibus & ex altera ripa totam noctem prosequentes nequicquam turbant. Cū diei principium fuit, Sancius nauiculas militibus compleuit, & in aduersam ripā adigit. Hostes, qui in ripæ custodia erant, primò restitè; sed vbi de suis aliquos cadere viderūt, metu terga vertè. Sancius ripam tenuit: atq; extemplò illis, quos ad Petram Salgadam miserat, præcepit, vt transitū properè attentarent: se hostes à tergo adoriturum. Portuenses Sancium traiecisse flumen sentientes, atq; aspicientes reliquos hostes aduersum se nauiculis ferri, metuentes ne à tergo opprimerentur, licet numero plures essent, tamen quia virtute & arte inferiores, in fuga sibi præsidium omne posuerunt. Cuius fugæ initium ab Antonio factum est: qui nec suæ, nec suorum virtuti quicquam fidens,

M 2 statim

statim post Sancij transitum primus in urbem pro-
uolauit; emētusq; est Castellanos ad ripam victos
esse. ac protinus pecuniam, quantā potuit, asportās
cum suis domesticis & necessarijs Vianam profugit.
Sancius potius utroq; transitu suos in montes rece-
pit, vnde hostes ad VII. m. fugauerat. Post ad vr-
bem agmen admouit. quod aduersarij ex oppido
multis tormentis arcere conati sunt: sed maximus
imber inutilia tormenta effecit. Tandem colloquijs
ciues ad accipiendū regis Philippi imperium indu-
xit. Atq; illico expeditissimos equites ad insequen-
dum Antonium in diuersas partes emisit. Per id
temporis Episcopus Igæditanienſis, qui stipatus ar-
matorum manu ciuitatibus milites imperabat, di-
missis copijs, quas coëgerat, salutis suæ fuga late-
brisque consuluit. Idem quoque ab Odoardo Le-
mo factum est. Cæterū Antonius Vianæ nauim cō-
scenderat, & portu soluerat, vt in Galliam nauiga-
ret: orta verò tempestate reuersus in litus excende-
rat. Interuentum autem aliquem hostium cauens,
in occulta loca cum suis vitabundus concedit: sed
in paucos Sancij equites de improviso incidit: e quo-
rum manibus, dum eorum animos pecuniæ, quam
multam fert, præda intentos habet, ignotus ela-
bitur. Ac deinde vestem mutando, ac modò huc,
modò illuc itinera inflectendo non semel insequētes
se hostes gnauiter elusit. ac sæpe etiam ab insequē-
do spe pacis & deditioſis retinuit. Interea rex Phi-
lippus è morbo conualuit. at regina Anna febri cor-
repta ex hac vita recessit, magnum sui desiderium

in

in marito relinquens. Porro Deus mortalium læ-
titiam tristitia miscet ac temperat. Pacata Por-
tugalia Eluem aduenit. quo loci Dux Brigantinus
salutatum eum venit. ipse post inuisit Catharinam
Ducis Brigantini vxorem cōsobrinam suam in pa-
go, cui nomen est Villaboina M. pass. ab Elue. De-
inde Elue discessit: prætergrediensque Portalegrē
& Abrantem, Tomar petijt, vbi totius regni con-
cilium indixerat. Tomar est oppidum, quod ve-
teres Neobantiam appellarunt, in Cistagana inter
Scalabim & Conimbricam, ab hac XXXVI. ab illa
XXIV m. pass. distans, in longa, sed angusta planitie:
quam à dextra fluius non longè illinc oriens ablu-
it, à sinistra colles vitibus & oliuis consiti cingunt.
In quorum vnus summo, nempe eius, qui oppido
imminet, templum est antiquum & augustum, ac
templo iuncta ingens atque pulcherrima domus
olim militum templariorum, nunc Christi militiæ
Fratrum. In huius domus primo & maximo atrio
regijs aulæis & peristromatis ornato Antistitū Dy-
nastarum Procuratorum ciuitatum conuentus ha-
biti sunt, sedente in solio rege Philippo ornatu re-
gali. Atque in primo conuentu Antonius Pineirus
Episcopus Leriensis hæc loquutus est. Inter cæteras
prouisiones à Spiritu sancto Ecclesiæ, quam suo nu-
mine gubernat, significatas ad extirpandas prauas
hæreses, componendos novos motus, corrigendos
malos mores semper experimento visa est optima
patrum ritè, & Pontificis maximi omnium princi-
pis & pastoris autoritate conuocatorum congre-
gatio.

gatio. Et quamvis conuentus à regibus, qui summū
ius tenent, indicti certam adeò Spiritus sancti præ-
sentiam, atque eam prærogatiuam nō habeant, quā
à Deo sanctis patrum concilijs datam scimus, ne
qua errent in statuendis & decernendis rebus ad cō-
munem vtilitatem spectantibus: tamen de Dei bo-
nitate, & prouidentia, quam singularem in regno-
rum institutione, administratione, & mutatione
semper ostendit, sperare possumus, & debemus,
quòd Spiritus sanctus etiam præsens aderit in regni
concilio legitimi regis iussu conuocato ad consultā-
dum de his, quæ ad veri Dei honorem, catholicæ fi-
dei conseruationem & amplificationem, populi
tranquillitatem, ocium, & commoda pertinent.
Quarum sanè quidem rerum causā **Rex** noster coë-
git totius *Portugaliæ* concilium. qui statim atq; in
Portugaliā ingressus est, vt regni necessitatibus &
vtilitatibus prouideret, non vt dominum, sed maio-
rum suorum exemplo se cum *Portugalesibus* vt
patrem gerens, totius regni conuentum indixit; vt
ex communi consilio statueret quæ reipubl. maxi-
mè profutura essent. Itaque vestra prudentia fide
studio fretus sperat se à vobis de his rebus, quæ re-
gni vtilitatem respiciunt, optima mente & animo
summam Dei, ac regis, & regni rationem habente
commonendum. Quantam verò nobis ipse ma-
gnorum beneficiorum spem dederit, indicat edictū
ante regni concilium promulgatum: quo impuni-
tatem omnibus concedit, qui vel decepti, vel in-
ducti, aut compulsi pacem publicam violarunt, &
cum

eum de regni sui possessione turbare conati sunt . quod edictum ingenti nostro cum gaudio ab alijs audiuius, & legimus ipsi . Vnde quò maius fuit hoc beneficium , peculiaris eius innatæ clementiæ fructus, eò magis in nostris animis confirmauit suæ in Portugalenses beneuolentiæ & benignitatis magnitudinē . pro qua studebit vos in dies maioribus beneficijs & honoribus ornare & amplificare secundum vestram fidelitatē & obedientiam : quam satis sibi persuadet vos erga se & successores suos in omne tempus retenturos . Post Pineiri orationem ciuitas Olyssiponensis omnium regni ordinum nomine summa cum reuerentia Regi maximas gratias egit , quòd totius regni concilium conuocauerit ; in quo de rebus his ageret , quæ ad Dei cultum , & regni incolumitatem ac tranquillitatem spectant . Ipsique pollicita est veterem & constantem illā fidē, qua impensè reges suos omni tempore coluerunt . Tum omnes regi Philippo primū , deinde eius filio Didaco regiæ stirpis maximo absenti , ac si præsens esset , iureiurando fidem suam obligarunt . Rex Philippus eorum veteres immunitates confirmauit, & quæ ante bellum per Ducem Osunæ obtulerat , priuilegia dedit : ac Ducem Brigantium creauit Portugalie Comestabilem ; illique omnia restituit , quæ bello amiserat . Postremò omnibus , qui contra se stetissent , impunitatem concessit : paucos excepit , quos indignos venia iudicauit . Peractis conuentibus , ad componendum regni statum Olyssiponem abiit : vnde paucos ante dies Antonius

nus desperatis rebus suis latenter euadens, in Gal-
liam nauigauerat. Rex in urbem magnifica
& regia pompa exceptus est,

F I N I S.

Imprimatur.


Flam. Torc. Vic. Gener. Neap.


F. Petrus Robertus Theol. vidit.


1-


93


1.6.678














005644201

